

नमो तस्स भगवतो अरहतो सम्मासम्बुद्धस्स ।

विसुद्धिमग्ग निदानकथा

विसुद्धिमग्गो नामायं गन्थो पिटकत्तयसारभूतो सकललोके पटिपत्तिदीपकगन्थानं अग्गो होति सेट्ठो पमुखो पामोक्खो उत्तमो पवरो चाति विञ्जूहि पसत्थो । तत्थ हि सङ्गीतित्तयारूळहस्स तेपिटकबुद्धवचनस्स अत्थं संखिपित्वा सिक्खत्तयसङ्गहितं ब्रह्मचरियं परिपुण्णं पकासितं सुविसदञ्च । एवं पसत्थस्सेतस्स विसुद्धिमग्गस्स **निदानकथा**यपि भवितब्बमेव । तस्मादानि तम्पकासनत्थमिदं पञ्चकम्मं वुच्चति —

“सो पनेस **विसुद्धिमग्गो** केन कतो, कदा कतो, कत्थ कतो, कस्मा कतो, किमत्थं कतो, किं निस्साय कतो, केन पकारेन कतो, किस्स सकललोके पत्थटो”ति ।

तत्थ **केन कतो**ति आचरियबुद्धघोसत्थेरवरेन तेपिटकसङ्गहट्ठकथाकारेन कतो ।

कदा कतोति अम्हाकं भगवतो सम्मासम्बुद्धस्स सकललोकनाथस्स परिनिब्बुतिकालतो पच्छा दसमे वस्ससतके (९७३ -बुद्धवस्से) कतो ।

कत्थ कतोति सीहळदीपे अनुराधपुरे महाविहारे कतो ।

कस्मा कतोति विसुद्धिकामानं साधुजनानं तदधिगमुपायं सम्मापटिपत्तिनयं आपेतुकामतासङ्घातेन अत्तनो अज्झासयेन सञ्चोदितत्ता, **सङ्घपालत्थेरेन** च अज्झेसितत्ता कतो ।

एत्थ पन ठत्वा आचरियबुद्धघोसत्थेरस्स उप्पत्ति कथेतब्बा, सा च **महावंसे** (चूळवंसोतिपि वोहरिते दुतियभागे) सत्तत्तिंसमपरिच्छेदे पन्नरसाधिकद्विसतगाथातो (३७, २१५) पट्ठाय बात्तिंसाय गाथाहि पकासितायेव । कथं? —

महावंस-बुद्धघोसकथा

२१५.बोधिमण्डसमीपम्हि, जातो ब्राह्मणमाणवो ।

विज्जा-सिप्प-कला-वेदी, तीसु वेदेसु पारगू ॥

२१६.सम्मा विज्जातसमयो, सब्बवादविसारदो ।

वादत्थी जम्बुदीपम्हि, आहिण्डन्तो पवादिको ॥

२१७.विहारमेकं मागम्म, रत्तिं पातञ्जलीमतं ।

परिवत्तेति सम्पुण्ण-पदं सुपरिमण्डलं ॥

२१८.तत्थेको रेवतो नाम, महाथेरो विजानिय ।

“महापज्जो अयं सत्तो, दमेतुं वट्ठती”ति, सो ॥

२१९. “को नु गद्रभरावेन, विरवन्तो”ति अब्रवि ।
 “गद्रभानं रवे अत्थं, किं जानासी”ति आह तं ॥

२२०. “अहं जाने”ति वुत्तो सो, ओतारेसि सकं मतं ।
 पुट्ठं पुट्ठं वियाकासि, विरद्धम्मि च दस्सयि ॥

२२१. “तेन हि त्वं सकं वाद-मोतारेही”ति चोदितो ।
 पाळिं माहांभिधम्मस्स, अत्थं मस्स न सोधिगा ॥

२२२. आह “कस्से”स मन्तो”ति, “बुद्धमन्तो”ति सो ब्रवि ।
 “देहि मेतं”ति वुत्ते हि, “गण्ह पब्बज्ज तं”इति ॥

२२३. मन्तत्थी पब्बजित्वा सो, उग्गणिह पिटकत्तयं ।
 एकायनो अयं मग्गो, इति पच्छा तं मग्गहि ॥

२२४. बुद्धस्स विय गम्भीर-घोसत्ता नं वियाकरं ।
 बुद्धघोसोति घोसो हि, बुद्धो विय महीतले ॥

२२५. तत्थ जाणोदयं [जाणोदयं नामपकरणं इदानीं कुहिञ्चिपि न दिस्सति ।] नाम, कत्वा पकरणं तदा ।
 धम्मसङ्गणियाकासि, कच्छं सो अट्ठसालिनिं [इदानीं दिस्समाना पन अट्ठसालिनी सीहळदीपिकायेव । न
 जम्बुदीपिका । परतो (५४-५५ पिट्ठेसु) एस आविभवस्सति] ॥

२२६. परित्तट्ठकथञ्चेव [परित्तट्ठकथन्ति पिटकत्तयस्स सङ्खेपतो अत्थवण्णनाभूता खुह्कट्ठकथाति अधिप्पेता भवेसु],
 कातुं आरभि बुद्धिमा ।
 तं दिस्वा रेवतो थेरो, इदं वचनमब्रवि ॥

२२७. “पाळिमत्तं इधानीतं, नत्थि अट्ठकथा इध [एत्थ सर्गीभित्तयारूळहा मोग्गलिपुत्ततिस्सत्थेरस्स सन्तिका उग्गहिता
 सिस्सानुसिस्सपरम्परातता मूलट्ठकथा कस्मा जम्बुदीपे सब्बसो अन्तरहिताति विमंसितब्बं] ।
 तथाचरियवादा च, भिन्नरूपा न विज्जरे ॥

२२८. सीहळट्ठकथा सुद्धा, महिन्देन मतीमता ।
 सङ्गीतित्तयमारूळहं, सम्मासम्बुद्धदेसितं ॥

२२९. सारिपुत्तादिगीतञ्च, कथामगं समेक्खिय ।
 कता सीहळभासाय, सीहळेसु पवत्तति ॥

२३०. तं तत्थ गन्त्वा सुत्वा त्वं, मागधानं निरुत्तिया ।
 परिवत्तेहि, सा होति, सब्बलोकहितावहा” ॥

२३१. एवं वुत्ते पसन्नो सो, निक्खमित्वा ततो इमं ।

दीपं आगा इमस्सेव [इदस्सेवाति इमस्सेव महानामरज्जो काले ९५३-९७५ बुद्धवस्से । अयञ्च वस्सपरिच्छेदो सीहळराजवंसं निस्साय दस्सितो । युरोपियविचक्खणानं पन मतेन ९४१-९६४ बुद्धवस्से इति वेदितब्बो । एवमुपरिपि] , रज्जो काले महामति ॥

२३२. महाविहारं सम्पत्तो, विहारं सब्बसाधुनं ।

महापधानघरं गन्त्वा, सङ्घपालस्स सन्तिका ॥

२३३. सीहळडुकथं सुत्वा, थेरवादञ्च सब्बसो ।

“धम्मस्सामिस्स एसोव, अधिप्पायो”ति निच्छिय ॥

२३४. तत्थ सङ्घं समानेत्वा, “कातुं अडुकथं मम ।

पोत्थके देथ सब्बे”ति, आह, वीमंसितुं स तं ॥

२३५. सङ्घो गाथाद्वयं तस्सा दसि “सामत्थियं तव ।

एत्थ दस्सेहि, तं दिस्वा, सब्बे देमाति पोत्थके” [२३४-५ गाथासु अयमत्थयोजना— “तत्थ महाविहारे संघं महानेत्वा संघं सन्निपातं कारेत्वा आचरियपुब्बद्धघोसो एवमाह ‘अडुकथं कातुं सब्बे पाळि-अडुकथा-पोत्थके मम देथा’ति । सो संघो तं वीमंसितुं संयुत्तनिकायतो ‘अन्तो जटा’ति आदिकं च ‘सीले पतिट्ठाया’ति आदिकं चाति गाथाद्वयं तस्स अदासि ‘एत्थ तव सामत्थियं जाणप्पभावं दस्सेति । तं दिस्वा सब्बे पोत्थके देमा’तिवत्त्वा”ति । इमिना पन अयमत्था दस्सितो होति “आचरिय बुद्धघोसो विसुद्धिमग्गं करोन्तो तदेव गाथाद्वयं ओलोकेत्वा, किञ्चिपि अज्जं पोत्थकं अनोलोकेत्वा अकासी”ति । तस्स पनत्थस्स युत्तायुत्तविचारणा परतो (३९-४९-पिट्ठेसु) आगमिस्सति] ॥

२३६. पिटकत्तयं मेत्थेव, सद्धिं अडुकथाय सो ।

विसुद्धिमग्गं नामाका, सङ्गहेत्वा समासतो ॥

२३७. ततो सङ्घं समूहेत्वा, सम्बुद्धमतकोविदं ।

महाबोधिसमीपम्हि, सो तं वाचेतु मारभि ॥

२३८. देवता तस्स नेपुज्जं, पकासेतुं महाजने ।

छादेसुं पोत्थकं सोपि, द्वत्तिक्खत्तुम्पि तं अका [२३८ गाथाय अयमत्थो— “देवता तस्स बुद्धघोसस्स नेपुज्जं निपुणञ्जाप्पसावं महाजनस्स पकासेतुं तेन लिखितं विसुद्धिमग्गपोत्थकं छादेसुं पटिच्छादेत्वा अपस्सियभावं पापेत्वा ठपेसुं । सोपि बुद्धघोसो दुतियम्पि तं लिखि, तम्पि देवता छादेसुं । ततियम्पि लिखी”ति । तेन वुत्तं “द्वत्तिक्खत्तुम्पि तं अका”ति । इदमेव महावंसवचनं निस्साय वित्तारेत्वा कथिताय बुद्धघोसुप्पत्तिया नाम कथाल एकरत्तेनेव विसुद्धिमग्गस्स तिक्खत्तुम्पि लिखित्वा निट्ठापितभावो पकासितो । ईदिसी पन कथा बहूनां विम्वयजननीपि परिक्खकानं संसयजननी होति । तस्मा इमिस्सापि विचारणा परतो (४७-८-पिट्ठेसु) दस्सियिस्सति] ॥

२३९.वाचेतुं ततिये वारे, पोत्थके समुदाहटे ।
पोत्थकद्वयं मज्झम्पि, सण्ठपेसुं तहिं मरू ॥

२४०.वाचयिंसु तदा भिक्खू, पोत्थकत्तयं मेकतो ।
गन्थतो अत्थतो वापि, पुब्बापरवसेन वा ॥

२४१.थेरवादेहि पाळीहि, पदेहि व्यञ्जनेहि वा ।
अञ्जथत्तमहू नेव, पोत्थकेसुपि तीसुपि ॥

२४२.अथ उगघोसयी सङ्घो, तुट्ठहट्ठो विसेसतो ।
निस्संसयं स मेत्तेय्यो, इति वत्त्वा पुनप्पुनं ॥

२४३.सद्धिं अट्ठकथायां दा, पोत्थके पिटकत्तये ।
गन्थाकरे वसन्तो सो, विहारे दूरसङ्करे ॥

२४४.परिवत्तेसि सब्बापि, सीहळट्ठकथा तदा ।
सब्बेसं मूलभासाय, मागधाय निरुत्तिया ॥

२४५.सत्तानं सब्बभासानं, सा अहोसि हितावहा ।
थेरियाचरिया सब्बे, पाळिं विय तं मग्गहं ॥

२४६.अथ कत्तब्बकिच्चेसु, गतेसु परिनिट्ठिति ।
वन्दितुं सो महाबोधिं, जम्बुदीपं उपागमीति [सो महाबोधि वन्दितुं जम्बुदीपं उपागमीति इदं वचनं
पुरिमवचनेहि असंसदुं विय होति । पुब्बे हि “आचरियबुद्धघोसो बोधिमण्डसमीपे जातो”ति च, “सीहळदीपं
गन्त्वा सीहळट्ठकथायो मागधभासाय परिवत्तेहीति तस्साचरियेन रेवतत्थेरेन वुत्तो”ति च वुत्तं । तस्मा इधापि
आचरियबुद्धघोसस्स पवन्ति तदनुरूपा “ता भासापरिवत्तितट्ठकथायो आदाय सासनुज्जोतनत्थं जम्बुदीपं
उपागमी”ति एवमादिना सासनुज्जोतनमूलिका एव भवितुं अरहति, न पन महाबोधिवन्दनमूलिकाति] ॥

अयञ्च पन महावंसकथा १९५० - खरिस्तवस्से हाबदमहाविज्जालयमुद्दणयन्ते रोमक्खरेन मुद्धितस्स
विसुद्धिमग्गपोत्थकस्स पुरेचारिककथायं “अनेकानेत्य अत्थि विचारेतब्बानी”ति वत्त्वा धम्मानन्दकोसम्बीनामकेन
विचक्खणेन विचारिता । तमेत्थ युत्तायुत्तविचिननाय दस्सेत्वा अनुविचारणम्पिस्स करिस्साम ।

जातिदेसविचारणा

१. तत्थ हि तेन धम्मानन्देन “बुद्धघोसो बोधिमण्डसमीपे (बुद्धगयायं) जातोति न युत्तमेत”न्ति वत्त्वा तंसाधनत्थाय
चत्तारि व्यतिरेककारणानि दस्सितानि । कथं?

(क) “बुद्धघोसेन पकासितेसु तंकालिकवत्थूसु एकम्पि तं नत्थि, यं मगधेसु उप्पन्न”न्ति पठमं कारणं दस्सितं । तदकारणमेव । आचरियबुद्धघोसत्थेरो हि सङ्गहट्ठकथायो करोन्तो पोराणट्ठकथायोयेव संखिपित्वा, भासापरिवत्तनमत्तेन च विसेसेत्वा अकासि, न पन यं वा तं वा अत्तनो दिट्ठसुतं दस्सेत्वा । वुत्तज्जेतं आचरियेन —

“संवण्णनं तज्ज समारभन्तो,
तस्सा महाअट्ठकथं सरीरं ।
कत्वा महापच्चरियं तथेव,
कुरुन्दिनामादिसु विस्सुतासु ॥

विनिच्छयो अट्ठकथासु वुत्तो,
यो युत्तमत्थं अपरिच्चजन्तो ।
अथोपि अन्तो गधथेरावादे,
संवण्णनं सम्म समारभिस्स”न्ति [पारा० अट्ठ० १.गन्थारम्भकथा] च ॥

“ततो च भासन्तरमेव हित्वा,
वित्थारमगज्ज समासयित्वा ।
विनिच्छयं सब्बमसेसयित्वा,
तन्तिक्कमं किञ्चि अवोक्कमित्वा ॥

सुत्तन्तिकानं वचनानमत्थं,
सुत्तानुरूपं परिदीपयन्ती ।
यस्मा अयं हेस्सति वण्णनापि,
सक्कच्च तस्मा अनुसिक्खितब्बा”न्ति [पारा० अट्ठ० १.गन्थारम्भकथा] च ॥

यथेव च आचरियबुद्धघोसेन अत्तनो अट्ठकथासु तंकालिकानि मागधिकानि वत्थूनि न पकासितानि, तथेव सीहळिकानिपि दक्खिणइन्दियरट्ठिकानिपि । न हि तत्थ **वसभराज**कालतो (६०९-६५३ -बुद्धवस्स) पच्छा उप्पन्नवत्थूनि दिट्ठानि ठपेत्वा **महासेनराज**वत्थुं [पारा० अट्ठ० २.२३६-२३७], आचरियो च ततो तिसतमत्तवस्सेहि पच्छातरे **महानामरज्जो** काले (९५३-९७५-बु-व) सीहळदीपमुपागतो । तस्मा अट्ठकथासु तंकालिकमागधिकवत्थूनं अप्पकासनमत्तेन न सक्का तक्कत्ता न मागधिकोति जातुन्ति ।

[ख) पुनपि तेन “सब्बेसुपि बुद्धघोसगन्थेसु उत्तरइन्दियदेसायत्तं पच्चक्खतो दिट्ठस्स विय पकासनं नत्थी”न्ति दुतियं कारणं दस्सितं । तस्सपि अकारणभावो पुरिमवचनेनेव वेदितब्बो । अपिच **सारत्थप्पकासिनिया** नाम संयुत्तट्ठकथायं, **सुमङ्गलविलासिनिया** नाम दीघनिकायट्ठकथायञ्च वुत्तसंवण्णनायपि वेदितब्बो । तत्थ हि —

“यथेव हि कलम्बनदीतीरतो राजमातुविहारद्वारेन थूपारामं गन्तब्बं होति, एवं हिरज्जवतिकाय नाम नदिया पारिमतीरतो सालवनं उय्यानं । यथा अनुराधपुरस्स थूपारामो, एवं तं कुसिनाराय होति । थूपारामतो दक्खिणद्वारेन नगरं पविसनमग्गो पाचीनमुखो गन्त्वा उत्तरेन निवत्तति, एवं उय्यानतो सालपन्ति पाचीनमुखा गन्त्वा उत्तरेन

निवत्ता । तस्मा तं उपवत्तनन्ति वुच्चती”ति [सं० नि० अट्ट० १.१.१८६; दी० नि० अट्ट० २.१९८] —

पच्चक्खतो दिट्ठस्स विय पकासनम्पि दिस्सतेव । तम्पि पन पोराणट्ठकथाहि भासापरिवत्तनमत्तमेवाति गहेतब्बं, तादिसाय अत्थसंवण्णनाय महामहिन्दत्थेरकालतोयेव पभुति वुत्ताय एव भवितब्बत्ताति ।

[ग] पुनपि तेन “उण्हस्साति अगिसन्तापस्स, तस्स वनदाहादीसु सम्भवो वेदितब्बो”ति **विसुद्धिमग्गे** (१, ३०-पिट्ठे) वुत्तसंवण्णनं पकासेत्वा “तस्सा पनस्स अवहसनीयभावो पाकटोयेवा”ति च हीळेत्वा “इन्दियरट्ठे पन उत्तरदेसेसु गिम्हकाले वत्थच्छादनरहिता मानुसकायच्छवि सूरियसन्तापेन एकंसतो दय्हति, तं न जानन्ति दक्खिणइन्दियदेसेसिका”ति ततियं कारणं दळ्हतरभावेन दस्सितं । तत्थ पन यदि “सूरियसन्तापेन एकंसतो दय्हती”ति एतं उजुकतो सूरियरस्मिसन्तापेनेव दट्ठभावं सन्धाय वुच्चेय्य, एवं सति **डंसमकसवातातपसरीसपसम्फस्सानन्ति** पदे **आतपसद्देन** समानत्थत्ता न युत्तमेव । यदि पन सूरियसन्तापसज्जातेन उण्हउतुना दट्ठभावं सन्धाय वुच्चेय्य, एवं सति उत्तरइन्दियदेसेसु, अज्जत्थ च तादिसेसु अतिउण्हट्ठानेसु सूरियसन्तापसज्जातस्स उण्हउतुनो पटिघाताय चीवरं सेनासनञ्च पटिसेवीयतीति अयमत्थो न न युत्तो । तथा हि वुत्तं **विनयट्ठकथायं** (३, ५८)

“सीतं उण्हन्ति उतुविसभागवसेन वुत्त”न्ति ।

सा पन विसुद्धिमग्गे पदत्थसंवण्णना पोराणसुत्तन्तट्ठकथाहि आगता भवेय्य । तथा हि वुत्तं **पपञ्चसूदनिया** नाम मज्झिमनिकायट्ठकथाय **सब्बासवसुत्तवण्णनायं** (१, ५८) “उण्हन्ति चेत्थ अगिसन्तापोव वेदितब्बो, सूरियसन्तापवसेन पनेतं वत्थु वुत्त”न्ति । एत्थ च सचायमत्थो आचरियेन अत्तनो मतिवसेन वुत्तो अस्स, तस्स वत्थुस्स पोराणट्ठकथायं वुत्तभावञ्च तस्सा अत्थसंवण्णनाय अत्तनो मतिभावञ्च युत्तभावञ्च पकासेय्य । आचरियो हि यत्थ यत्थ पोराणट्ठकथासु अवुत्तत्थं विसेसेत्वा दस्सेति, तत्थ तत्थ तादिसं आपकवचनम्पि पकासेतियेव, यथा **सुमङ्गलविलासिनियं** (१, ७२) “एत्थ आणत्तियनिस्सगियथावरापि पयोगा युज्जन्ति, अट्ठकथासु पन अनागतत्ता वीमंसित्वा गहेतब्बा”ति वचनं, यथा च **पपञ्चसूदनियं** (१, ३०) “अविचारितमेतं पोराणेहि, अयं पन अत्तनो मती”ति वचनं । न चेत्थ किञ्चिपि आपकवचनं पकासितं । तस्मा “यदेतं ‘उण्हस्साति अगिसन्तापस्सा’ति च, ‘उण्हन्ति चेत्थ अगिसन्तापोव वेदितब्बो’ति च वचनं, एतं पोराणसुत्तन्तट्ठकथावचन”न्ति वेदितब्बन्ति ।

(घ) पुनपि तेन “**पपञ्चसूदनिया** नाम मज्झिमनिकायट्ठकथायं **गोपालकसुत्तं** संवण्णेन्तो [म० नि० अट्ट० १.३५०] बुद्धघोसो ‘मगधविदेहरट्ठानं अन्तरे गङ्गाय नदिया मज्झे वालुकत्थलदीपका अत्थी”ति सद्वहति मज्जे । बुद्धघोसेन पन दिट्ठगङ्गा सीहळदीपे महावेलिगङ्गायेव, न पन इन्दियरट्ठिकानं सेट्ठसम्मता महागङ्गाति पाकटोयेवायमत्थो”ति चतुत्थं कारणं दस्सितं । तं पन इदानी महागङ्गाय मज्जे तस्मिं ठाने तादिसं दीपकं अदिस्वा “पुब्बेपि एवमेव भवेय्या”ति एकंसतो गहेत्वा वुत्तवचनमत्तमेव । नदियो पन सब्बदापि तेनेवाकारेन तिट्ठन्तीति न सक्का गहेतुन्ति पाकटोयेवायमत्थो । तस्मा यथा पुब्बे तस्स गोपालस्स काले तस्मिं ठाने मज्जे गङ्गाय तादिसा दीपका संविज्जमाना अहेसुं, तथेव पोराणट्ठकथासु एस अत्थो संवण्णितो, तदेव च वचनं आचरियेन भासापरिवत्तनं कत्वा पकासितन्ति एवमेव गहेतब्बं । तस्मा तम्पि अकारणमेवाति ।

ब्राह्मणकुलविचारणा

२. अथ “ब्राह्मणमाणवो”ति पदम्पि तेन एवं विचारितं —

(क) “बुद्धघोसो ‘ब्राह्मणकुलजातो’ति न सक्का गहेतुं। कस्मा वेदकालतो पट्टाय यावज्जतना सब्बेपि ब्राह्मणा

ब्राह्मणोस्य मुखमासीदि, बाहू राजन्य? कत?।

ऊरू तदस्य यद वग्य?, पद्भ्यां गूढो अजायता’ति [इरुवेद, १०-मण्डल, ९०। तथा अथव ६ वेद १९, ६, ६] ॥

इमं पुरिससुत्तं नाम मन्तं जानन्तीति सद्वहिया।

अयं पनस्सा अत्थो — ‘ब्राह्मणो अस्स (ब्रह्मणो) मुखं आसि। बाहू राजज्जो कतो, खत्तिया अस्स बाहूति वुत्तं होति। यो वेस्सो, सो अस्स ऊरू। सुद्धो अस्स पादेहि अजायी’ति।

बुद्धघोसो पन ‘पण्डितब्राह्मणो’ति जातोपि तं गाथं न अज्जासि। तथा हि तेन बन्धुपादापच्चाति पदस्स अत्थवण्णनायं ‘तेसं किर अयं लद्धि — ब्राह्मणा ब्रह्मणो मुखतो निक्खन्ता, खत्तिया उरतो, वेस्सा नाभितो, सुद्धा जाणुतो, समणा पिट्ठिपादतो’ति [दी० नि० अट्ठ० १.२६३; म० नि० अट्ठ० १.५०८] तिस्सा वेदगाथाय असमानत्थो वण्णितो’ति।

अयं पनेत्थ अनुविचारणा — यदि च तं कालिकानमि ब्राह्मणानं लद्धि तथेव भवेय्य यथा एतिस्सं गाथायं वुत्ता, सा चत्थवण्णना आचरियस्स मतिमत्ता। एवं सति सा विचारणा युत्ता भवेय्य। एतिस्सं पन गाथायं “ब्राह्मणोस्य मुखमासीदि”ति पठमपादेन “ब्राह्मणा ब्रह्मणो मुखतो जाता”ति अत्थो उजुकतो न लब्धति। बुद्धकाले पन ब्राह्मणानं लद्धि “ब्राह्मणा ब्रह्मणो मुखतो जाता”ति एवमेव अहोसीति पाकटोयेवायमत्थो। तथा हि दीघनिकाये पाथिकवगगे अगगज्जसुत्ते (३, ६७) —

“दिस्सन्ति खो पन वासेट्ठ ब्राह्मणानं ब्राह्मणियो उतुनियोपि गब्भिनियोपि विजायमानापि पायमानापि। ते च ब्राह्मणा ० योनिजाव समाना एवमाहंसु — ब्राह्मणोव सेट्ठो वण्णो, हीना अज्जे वण्णा। ब्राह्मणोव सुक्को वण्णो, कण्हा अज्जे वण्णा। ब्राह्मणाव सुज्झन्ति, नो अब्राह्मणा। ब्राह्मणाव ब्रह्मणो पुत्ता ओरसा मुखतो जाता ब्रह्मजा ब्रह्मनिम्मिता ब्रह्मदायादाति। ते ब्रह्मानज्जेव अब्भाचिक्खन्ति, मुसा च भासन्ति, बहुज्ज अपुज्जं पसवन्ती’ति —

भगवता महाकारुणिकेन वासेट्ठभारद्वाजानं ब्राह्मणमाणवकानं भासितं, तेहि च तं अभिनन्दितं। ते पन द्वेपि माणवका जातिवसेन परिसुद्धब्राह्मणा चेव होन्ति तिण्णमि वेदानं पारगुनो च। तस्मा “ब्राह्मणा ब्रह्मणो मुखतो निक्खन्ता”ति वचनस्स तं कालिकानं ब्राह्मणानं लद्धिवसेन वुत्तभावो पाकटोयेव। यथा चेतं, एवं “खत्तिया उरतो, वेस्सा नाभितो, सुद्धा जाणुतो, समणा पिट्ठिपादतो”ति वचनमि “तं कालिकब्राह्मणानं लद्धिज्जूहि पोरणट्ठकथाचरियेहि वुत्त”न्ति सद्वहित्वा आचरियबुद्धघोसेन तं सब्बं पोरणट्ठकथातो भासापरिवत्तनमत्तेन विसेसेत्वा पकासितं भवेय्य। तस्मा तायपि वेदगाथाय आचरियस्स अब्राह्मणभावसाधनं अनुपपन्नमेवाति।

(ख) पुनपि तेन आचरियबुद्धघोसत्थेरस्स अब्राह्मणभावसाधनत्थं दुतियमि कारणं एवमाहटं —

“ब्राह्मणगन्थेसु गब्भघातवाचकं भूनहाति पदं पाळियं भूनहु (भूनहनो) इति दिस्सति। मागण्डियसुत्ते भरियाय मेथुनसंवासाभावेन उप्पज्जनारहगब्भस्स नासकत्तं सन्धाय मागण्डियो परिब्बाजको भगवन्तं ‘भूनहु (भूनहनो) समणो गोतमो’ति [म० नि० २.२०७ आदयो] आह। तं बुद्धघोसो न जानातीति पाकटोयेव तदत्थसंवण्णनाय। तत्थ हि तेन भूनहुनोति (भूनहनस्सा) पदं ‘हतवट्ठिनो मरियादकारकस्सा’ति [म० नि० अट्ठ० २.२०७] वण्णित’न्ति।

तस्मि अयुत्तमेव । न हि मागण्डियेन फोडुब्बारम्मणापरिभोगमत्तमेव सन्धाय भूनहुभावो वुत्तो, अथ खो छन्नम्पि लोकामिसारम्मणानं अपरिभोगं सन्धाय वुत्तो । तस्मिञ्चि सुत्ते —

“चक्खुं खो मागण्डिय रूपारामं रूपरतं रूपसम्मदितं, तं तथागतस्स दन्तं गुत्तं रक्खितं संवुत्तं, तस्स च संवराय धम्मं देसेति, इदं नु ते एतं मागण्डिय सन्धाय भासितं ‘भूनहु समणो गोतमो’ति । एतदेव खो पन मे भो गोतम सन्धाय भासितं ‘भूनहु समणो गोतमो’ति । तं किस्स हेतु, एवञ्चि नो सुत्ते ओचरतीति...पे०... मनो खो मागण्डिय धम्मारामो धम्मरतो धम्मसम्मदितो, सो तथागतस्स दन्तो गुत्तो रक्खितो संवुत्तो, तस्स च संवराय धम्मं देसेति, इदं नु ते एतं मागण्डिय सन्धाय भासितं ‘भूनहु समणो गोतमो’ति । एतदेव खो पन मे भो गोतम सन्धाय भासितं ‘भूनहु समणो गोतमो’ति । तं किस्स हेतु, एवञ्चि नो सुत्ते ओचरती’ति [म० नि० २.२०७ आदयो] ।

एवं भगवतो च अनुयोगो मागण्डियस्स च पटिज्जा आगता ।

एत्थ हि मेशुनप्पटिसेवनवसेन फोडुब्बारम्मणपरिभोगहेतु एव गब्भपतिट्ठानं सम्भवतीति तदपरिभोगमेव सन्धाय “भूनहु”ति वत्तुं अरहति, तदज्जेसं पन पच्चन्नं रूपादिआरम्मणानं, तत्थापि विसेसतो धम्मारम्मणस्स सुद्धमनोविज्जाणेन परिभोगहेतु नत्थि किञ्चि गब्भपतिट्ठानन्ति तेसं अपरिभोगं सन्धाय भूनहूति वत्तुं न अरहतियेव, मागण्डियेन पन सब्बानिपि तानि सन्धाय वुत्तभावो पटिज्जातो, कारणज्वस्स दस्सितं “एवञ्चि नो सुत्ते ओचरती”ति । तस्मा किञ्चापि दानि ब्राह्मणगन्थेसु भूनहु- (भूनहा) सद्धो गब्भघातनत्थे दिस्सति, मागण्डियसुत्ते पनेसो अत्थो न युज्जतीति आचरियेन “हतवड्ढि मरियादकारको”ति अयमेवत्थो पोरणट्ठकथाय भासापरिवत्तनवसेन पकासितोति वेदितब्बो ।

(ग) पुनपि तेन “इदम्पन बुद्धघोसस्स अब्राह्मणभावसाधकं पच्छिमकारणं, सो हि विसुद्धिमग्गे सीलनिद्देसे (१, ३१) ब्राह्मणानं परिहासं करोन्तो ‘एवं इमिना पिण्डपातपटिसेवनेन पुराणज्व जिघच्छावेदनं पटिहङ्गामि, नवज्व वेदनं अपरिमितभोजनपच्चयं आहरहत्थक अलंसाटक तत्रवट्टक काकमासक भुत्तवमितकब्राह्मणानं अज्जतरो विय न उप्पादेस्सामीति पटिसेवती’ति आह । इदं पन एकस्स भिन्नब्राह्मणलद्धिकस्सापि वचनं सियाति तदेव दळ्ळकारणं कत्वा न सक्का ‘बुद्धघोसो अब्राह्मणो’ति वत्तु”न्ति ततियं कारणं वुत्तं । तं पन अतिसंवेजनीयवचनमेव । न हेतं आचरियेन ब्राह्मणानं परिहासं कातुकामेन वुत्तं, न च तं परिहासवचनेन संयोजेतब्बट्ठानं, अज्जदत्थु यथाभूतमत्थं दस्सेत्वा सब्रह्मचारीनं ओवादानुसासनिदानवसेन वत्तब्बट्ठानं, तथायेव च आचरियेन वुत्तं । तथा हि ये लोके परदत्तूपजीविनो समणा वा ब्राह्मणा वा अज्जे वापि च पुगला, ते पच्चवेक्खणजाणरहिता असंवरे ठिता कदाचि अतिपणीतं रसं पहतं लद्धा अपरिमितम्पि भुज्जेय्युं, विसेसतो पन ब्राह्मणा लोकिकवत्थुवसेन च, जातकादिसासनिकवत्थुवसेन च तादिसा अहेसुन्ति पाकटा । इमस्मिञ्चि लोके वस्ससतसहस्सेहि वा वस्सकोटीहि वा अपरिच्छिन्नद्धाने को सक्का वत्तुं “नेदिसा भूतपुब्बा”ति । तस्मा तादिसेहि विय न अपरिमितभोजनेहि भवितब्बन्ति ओवादानुसासनिदानवसेनेव वुत्तं । तदेवं अत्थसंहितम्पि समानं अयोनिमोमनसिकरोतो अनत्थमेव जातं, यथा सभरियस्स मागण्डियब्राह्मणस्स अनागामिमग्गफलत्थायपि देसिता गाथा [ध० प० अट्ठ० १.सामावतीवत्थु] तेसं धीतुया अनत्थाय संवत्ततीति संवेगोयेवेत्थ ब्रूहेतब्बोति ।

पतज्जलिवादविचारणा

३. अथ तेन “पातज्जलीमतं परिवत्तेती”ति वचनम्पि एवं विचारितं ।

(क) “बुद्धघोसो पतञ्जलिस्स वा अज्जेसं वा उत्तरइन्दियरट्ठिकानं वादं अप्पकमेव अज्जासि । पतञ्जलिवादेसु हि **अणिमा लघिमा**ति इदमेव द्वयं दस्सेसि [विसुद्धि० १.१४४] ततुत्तरि योगसुत्तं अजानन्तो, पतञ्जलिवादस्स च तुलेत्वा दीपना तस्स गन्थेसु न दिस्सति, पतञ्जलिना कतपकरणञ्च पतञ्जलीति नाममत्तम्पि च तत्थ दीपितं नत्थि । **विसुद्धिमग्गे** पन पज्जाभूमिनिद्वेसे ‘पकतिवादीनं पकति विया’ति [विसुद्धि० २.५८४] पकतिवाद (संख्यावाद) नाममत्तं पकासितं, तत्थेव च ‘पटिज्जा हेतूतिआदीसु हि लोके वचनावयवो हेतूति वुच्चती’ति [विसुद्धि० २.५९५] उदाहरितं, तेन जायति ‘बुद्धघोसो इन्दियतक्कनयदीपके जायगन्थस्मिं किञ्चि मूलभागमत्तं अपरिपुण्णं जानाती’ति” ।

तं पन सब्बम्पि केवलं आचरियस्स अब्भाचिक्खणमत्तमेव । अतिगम्भीरस्स हि अतिगरुकातब्बस्स सुपरिसुद्धस्स पिटकत्तयस्स अत्थसंवण्णनं करोन्तेन सुपरिसुद्धोयेव पाळिनयो च अट्ठकथानयो च पोराणथेरवादा चाति ईदिसायेव अत्था पकासेतब्बा, यं वा पन अत्थसंवण्णनाय उपकारकं सद्विनिच्छयपटिसंयुत्तं लोकिगन्थवचनं, तदेव च यथारहं पकासेतब्बं, न पन अनुपकारानिपि तंतंगन्थतक्कत्तुनामानि च, तेहि वुत्तवचनानि च बहूनि, न च तेसं अप्पकासनेन “न ते अट्ठकथाचरियो जानाती”ति वत्तब्बो । यदि हि यं यं लोकिगन्थं अत्तना जानाति, तं सब्बं अनुपकारम्पि अत्तनो अट्ठकथायमानेत्वा पकासेय्य, अतिवित्थारा च सा भवेय्य अपरिसुद्धा च असम्मानिता च सासनिकविज्जूहीति आचरियेन पतञ्जलिवादयो न वित्थारेन पकासिताति जातब्बं, अज्जदत्थु येहि येहि लोकिगन्थेहि किञ्चि किञ्चि आचरियेन आनेत्वा पकासितं, ते ते च गन्था, अज्जेपि च तादिसा आचरियेन जातात्वेव जानितब्बा विज्जूहि, यथा समुद्धस्स एकदेसं दिस्वा सब्बोपि समुद्धो एदिसोति जायति । आचरियो पन यत्थ यत्थ वेदपटिसंयुत्तवचनानि आगतानि, तत्थ तत्थ वेदगन्थेहिपि किञ्चि किञ्चि आनेत्वा पकासेसियेव । तथा हि आचरियेन **सुमङ्गलविलासिनियं** नाम दीघनिकायट्ठकथायं

“**तिण्णं वेदानन्ति** इरुवेदयजुवेदसामवेदान”न्ति [दी० नि० अट्ठ० १.२५६] च,

“**इतिहासपञ्चमानन्ति** अथब्बणवेदं चतुत्थं कत्वा इतिह आस इतिह आसाति ईदिसवचनपटिसंयुत्तो पुराणकथासङ्घातो इतिहासो पञ्चमो एतेसन्ति इतिहासपञ्चमा, तेसं इतिहासपञ्चमानं वेदान”न्ति [दी० नि० अट्ठ० १.२५६] च,

“यिट्ठं वुच्चति महायागो”ति [दी० नि० अट्ठ० १.१७०-१७२] च,

“**अग्निहोमन्ति** एवरूपेन दारुना एवं हुते इदं नाम होतीति अग्निजुहनं । दब्बिहोमादीनिपि अग्निहोमानेव, एवरूपाय दब्बिया ईदिसेहि कणादीहि हुते इदं नाम होतीति एवं पवत्तिवसेन पन विसुं वुत्तानी”ति [दी० नि० अट्ठ० १.२१] च,

“सासपादीनि पन मुखेन गहेत्वा अग्निग्नि पक्खपनं, विज्जं परिजप्पित्वा जुहनं वा मुखहोम”न्ति [दी० नि० अट्ठ० १.२१] च —

एवमादिना वेदपटिसंयुत्तवचनानि वेदगन्थानुरूपतो वण्णितानि । तानि च पोराणट्ठकथातो भासापरिवत्तनवसेन वुत्तानिपि भवेय्युं, वेदगन्थेसु पन अकोविदेन याथावतो भासापरिवत्तनं कातुम्पि न सुकरमेव, तस्मा आचरियस्स वेदगन्थेसु कोविदभावोपि पाकटोयेव । एवं वेदगन्थेसु च तदज्जलोकिगन्थेसु च सुकोविदस्सेव समानस्स तेसं वित्थारतो

अप्पकासनं यथावुत्तकारणेनेवाति वेदितब्बं ।

अपि च आचरियो अत्तनो गन्थारम्भेयेव —

“ततो च भासन्तरमेव हित्वा,
वित्थारमग्गञ्च समासयित्वा ।
विनिच्छयं सब्बमसेसयित्वा...पे०...
यस्मा अयं हेस्सति वण्णनापी”ति [पारा० अट्ठ० १.गन्थारम्भकथा] च॥

“अपनेत्त्वान ततोहं, सीहळभासं मनोरमं भासं ।
तन्तिनयानुच्छविकं, आरोपेत्वा विगतदोसं ॥

समयं अविलोमेन्तो, थेरानं थेरवंसपदीपानं ।
सुनिपुणविनिच्छयानं, महाविहारे निवासिनं ।
हित्वा पुनप्पुनागत-मत्थं अत्थं पकासयिस्सामी”ति [दी० नि० अट्ठ० १.गन्थारम्भकथा] च—

एवं पोरणट्ठकथानं भासापरिवत्तनसंखिपनवसेनेव विसेसेत्वा अभिनवट्ठकथायो करिस्सामीति पटिज्जं कत्वा यथापटिज्जातमेव अकासि, न अत्तनो जाणप्पभावेन विसेसेत्वातिपि वेदितब्बं । तस्मा अट्ठकथासु पतज्जलिवादादीनं वित्थारतो अप्पकासनमारब्ध “बुद्धघोसो पतज्जलिवादादीनि परिपुण्णं न जानाती”ति वचनं केवलं आचरियस्स अब्भाचिक्खणमत्तमेवाति ।

कब्बसत्थविचारणा

४. पुनपि सो एवमाह “किञ्चापि बुद्धघोसो रामायणमहाभारतसङ्घातानं महाकब्बसत्थानं सुकुसलो विय न दिस्सति, तथापि तानि दस्सेसि । कथं? अक्खानन्ति भारतयुज्झनादिकं, तं यस्मिं ठाने कथीयति, तत्थ गन्तुम्पि न वट्ठतीति [दी० नि० अट्ठ० १.१३] च, तस्स (सम्फपलापस्स) द्वे सम्भारा भारतयुद्धसीताहरणादिनिरत्थकथापुरेक्खारता तथारूपिकथाकथनञ्चाति [दी० नि० अट्ठ० १.८] च दस्सेसी”ति ।

तं पन पुरिमवचनतोपि अहेतुकतरं केवलं अनादरीकरणमत्तमेव । अतिगम्भीरत्थस्स हि अतिगरुकरणीयस्स पिटकत्तयस्स अत्थसंवण्णनायं निरत्थकस्स सम्फपलापसमुदायभूतस्स कब्बसत्थस्स वित्थारतो पकासनेन किं सिया पयोजनं, अज्जदत्थु सायेवस्स असम्मानिता, अनादरिया च विज्जूहीति ।

बाहुसच्चगुणमक्खनं

५. पुनपि धम्मानन्दो आचरियस्स बाहुसच्चगुणं मक्खेतुकामो एवमाह — “तस्स (बुद्धघोसस्स) समयन्तरकोविदसङ्घातं बाहुसच्चं न ततो उत्तरितरं होति, यं आधुनिकानं गन्थन्तरकोविदानं सीहळिकभिक्खूनं यं वा एकादसमे खरिस्तवस्ससतके (१००१-११००) उप्पन्नानं दक्खिणइन्दियरट्टिकानं अनुरुद्ध-धम्मपालादीनं भिक्खूनं”न्ति ।

तं पन सब्बथापि अयुत्तवचनमेव । यदि हि आधुनिका वा सीहळिकभिक्खू, पोराणा वा आचरियानुरुद्ध-
धम्मपालत्थेरादयो समयन्तरबाहुसच्चवसेन आचरियबुद्धघोसेन समाना वा उत्तरितरा वा भवेय्युं, ते
आचरियबुद्धघोसत्थेरस्स अट्ठकथाहि अनारद्धचित्ता हुत्वा ततो सुन्दरतरा परिपुण्णतरा च अभिनवट्ठकथायो करेय्युं, न पन
ते तथा करोन्ति, न केवलं न करोन्तियेव, अथ खो तेसं एकोपि न एवं वदति “अहं बुद्धघोसेन बाहुसच्चवसेन समसमोति
वा उत्तरितरो”ति वा, अज्जदत्थु ते आचरियस्स अट्ठकथायोयेव संवण्णेन्ति च उपत्थम्भेन्ति च, आचरियद्वाने च ठपेन्ति ।
तेनेतं जायति सब्बथापि अयुत्तवचनन्ति ।

महायानिकनयविचारणा

६. पुन सो तावत्तकेनापि असन्तुट्ठो आचरियं अवमज्जन्तो एवमाह — “महायाननिकायस्स पधानाचरियभूतानं अस्स
घोस-नागज्जुनानं नयं वा, नाममत्तम्पि वा तेसं न जानाति मज्जे बुद्धघोसो”ति । तं पन अतिविय अधम्मिकं निरत्थकज्ज
निग्गहवचनमत्तमेव । न हि निकायन्तरिकानं वादनयानं अत्तनो अट्ठकथायं अप्पकासनेन सो ते न जानातीति सक्का वत्तुं ।
ननु आचरियेन आगमट्ठकथासु गन्थारम्भेयेव —

“समयं अविलोमेन्तो, थेरानं थेरवंसपदीपानं ।
सुनिपुणविनिच्छयानं, महाविहारे निवासिन”न्ति च,

इथापि विसुद्धिमगो —

“महाविहारवासीनं, देसनानयनिस्सितं ।
विसुद्धिमगं भासिस्स”न्ति [विसुद्धिं १.२] च,

“तस्सा अत्थसंवण्णनं करोन्तेन विभज्जवादिमण्डलं ओतरित्वा आचरिये अनब्भाचिक्खन्तेन सकसमयं
अवोक्कमन्तेन परसमयं अनायूहन्तेन सुत्तं अप्पटिबाहन्तेन विनयं अनुलोमेन्तेन महापदेसे ओलोकेन्तेन धम्मं
दीपेन्तेन अत्थं सङ्गाहेन्तेन तमेवत्थं पुनरावत्तेत्वा अपरेहिपि परियायन्तरेहि निद्विसन्तेन च यस्मा अत्थसंवण्णना
कातब्बा होती”ति [विसुद्धिं २.५८१] च,

“सासनं पनिदं नाना-देसनानयमण्डितं ।
पुब्बाचरियमगो च, अब्बोच्छिन्नो पवत्तति ।
यस्मा तस्मा तदुभयं, सन्निस्सायत्थवण्णनं ।
आरभिस्सामि एतस्सा”ति [विसुद्धिं २.५८१] च,

पटिज्जं कत्वा यथापटिज्जातप्पकारेनेव अट्ठकथायो कता । एवमेतासं करणे कारणम्पेत्थ पकासेतब्बं, तस्मा दानि
तम्पकासनत्थं सम्मासम्बुद्धस्स परिनिब्बुतिकालतो पट्ठाया याव आचरियबुद्धघोसस्स कालो, ताव सासनप्पवत्तिक्कमम्पि
वक्खाम ।

सासनप्पवत्तिक्कमो

भगवतो हि परिनिब्बुतिकालतो पच्छा वस्ससतब्भन्तरे बुद्धसासने कोचिपि वादभेदो नाम नत्थि । वस्ससतकाले पन दुतियसङ्गीतिकारेहि थेरेहि निक्कड्डिता वज्जिपुत्तका भिक्खू पक्खं लभित्वा धम्मञ्च विनयञ्च अज्जथा कत्वा महासङ्गीतिनामेन विसुं सङ्गीतिमकंसु । तदा सङ्गीतिद्वयारूढपुराणधम्मविनयमेव सम्पटिच्छन्तानं थेरानं गणो थेरवादोति च तदज्जेसं महासङ्घिकोति च वोहरीयन्ति ।

पुन महासङ्घिकतो (१) गोकुलिको (२) एकव्योहारिकोति द्वे आचरियगणा उप्पन्ना । पुन गोकुलिकतो (३) पज्जत्तिवादो (४) बाहुलिको (बहुस्सुतिको)ति द्वे उप्पन्ना । पुन बाहुलिकतोपि (५) चेतियवादिगणो उप्पन्नोति एते पञ्च मूलभूतेन महासङ्घिकेन सह छ पाटियेक्का आचरियगणा अहेसुं ।

विसुद्धत्थेरवादतोपि (१) महिसासको (२) वज्जिपुत्तकोति द्वे आचरियगणा उप्पन्ना । पुन महिसासकतो (३) सब्बत्थिवादो (४) धम्मगुत्तिकोति द्वे उप्पन्ना । पुन सब्बत्थिवादतोपि (५) कस्सपियो, ततोपि (६) सङ्कन्तिको, ततोपि (७) सुत्तवादीति तयो उप्पन्ना । वज्जिपुत्तकतोपि (८) धम्मोत्तरियो (९) भदयानिको (१०) छन्नागारिको (११) सम्मितियोति चत्तारो उप्पन्नाति ते एकादस मूलभूतेन विसुद्धत्थेरवादेन सह द्वादस आचरियगणा अहेसुं । इति इमे च द्वादस पुरिमा च छाति अट्टारस आचरियगणा दुतियततियसङ्गीतीनं अन्तरे जाता अहेसुं ।

तेसु मूलभूतो थेरवादगणोयेव पोरणधम्मविनयगरुको हुत्वा अनूनमनधिकं केवलपरिपुण्णं परिसुद्धं पोरणिकं धम्मविनयं धारेसि । इतरे पन सत्तरस भिन्नगणा पोरणिकं धम्मविनयं अज्जथा अकंसु । तेन तेसं धम्मविनयो कत्थचि ऊनो कत्थचि अधिको हुत्वा अपरिपुण्णो चेव अहोसि अपरिसुद्धो च । तेन वुत्तं दीपवंसे पञ्चमपरिच्छेदे —

३०. “निक्कड्डिता पापभिक्खू, थेरेहि वज्जिपुत्तका ।
अज्जं पक्खं लभित्वान, अधम्मवादी बहू जना ॥
३१. दससहस्सा समागन्त्वा, अकंसु धम्मसङ्गहं ।
तस्मायं धम्मसङ्गीति, महासङ्गीतीति वुच्चति ॥
३२. महासङ्गीतिका भिक्खू, विलोमं अकंसु सासने ।
भिन्दित्वा मूलसङ्गहं, अज्जं अकंसु सङ्गहं ॥
३३. अज्जत्र सङ्गहितं सुत्तं, अज्जत्र अकरिंसु ते ।
अत्थं धम्मञ्च भिन्दिंसु, विनये निकायेसु च पञ्चसु...पे०...
४९. अत्थं धम्मञ्च भिन्दिंसु, एकदेसञ्च सङ्गहं ।
गन्थञ्च एकदेसज्हि, छट्टेत्वा अज्जं अकंसु ते ॥
५०. नामं लिङ्गं परिकखारं, आकप्पकरणीयानि च ।
पकतिभावं जहित्वा, तज्ज अज्जं अकंसु ते ॥
५१. सत्तरस भिन्नवादा, एकवादो अभिन्नको ।

सब्बेवद्धारस होन्ति, भिन्नवादेन ते सह ॥

५२. निग्रोधोव महारुक्खो, थेर वादानमुत्तमो ।
अनूनं अनधिकञ्च, केवलं जिनसासनं ।
कण्टका विय रुक्खम्हि, निब्बत्ता वादसेसका ॥

५३. पठमे वस्ससते नत्थि, दुतिये वस्ससतन्तरे ।
भिन्ना सत्तरस वादा, उप्पन्ना जिनसासने’ति [कथा० अट्ठ० निदानकथा] ॥

असोकरज्जो च काले परिहीनलाभसक्कारा अज्जतिथिया लाभसक्कारं पत्थयमाना भिक्खूसु पब्बजित्वा सकानि सकानि दिट्ठिगतानि दीपेन्ति “अयं धम्मो, अयं विनयो, इदं सत्थुसासनं”न्ति । भिक्खूनं सन्तिके पब्बज्जं अलभमानापि सयमेव केसे छिन्दित्वा कासायानि वत्थानि अच्छादेत्वा विहारेसु विचरन्ता उपोसथकम्मादिकरणकाले सङ्गमज्झं पविसन्ति, ते भिक्खुसङ्घेन धम्मेन विनयेन सत्थुसासनेन निगग्रहमानापि धम्मविनयानुलोमाय पटिपत्तिया असण्ठहन्ता अनेकरूपं सासनस्स अब्बुदञ्च मलञ्च कण्टकञ्च समुट्ठापेन्ति । केचि अग्गिं परिचरन्ति, केचि पज्चातपे तपन्ति, केचि आदिच्चं अनुपरिवत्तन्ति, केचि धम्मञ्च विनयञ्च वोभिन्दिस्सामाति तथा तथा पगगण्हन्ति । तदा भिक्खुसङ्घो न तेहि सङ्घि उपोसथं वा पवारणं वा अकासि, असोकारामे सत्त वस्सानि उपोसथो उपच्छिज्जि [कथा० अट्ठ० निदानकथा; पारा० अट्ठ० १.ततियसङ्गीतिकथा] ।

इमञ्च पन पवत्तिं उपादाय एवम्पि सक्का गहेतुं “सत्तरसन्नं भिन्नवादगणानं धम्मविनयस्स पच्छिमकालेसु अपरिसुद्धतरभावो ईदिसेनपि कारणेन अहोसी”ति । किञ्चापि हि बुद्धसासनभूते परिसुद्धधम्मविनये “कोचिपि निच्चो धुवो सस्सतो नाम नत्थि अज्जत्र निब्बानधातुया, परमत्थतो अत्तापि नत्थि, सब्बेपि सङ्गारा अनिच्चा अट्ठुवा असस्सता अनत्तायेवा”ति अत्थो अतिविय पाकटो होति, तथापि दानि अथेरवादिकानं गन्थेसु च पुब्बे वेतुल्लवादादीसु च “बुद्धो निच्चो धुवो सस्सतो अत्ता”ति च, “सब्बेपि सत्ता निच्चा धुवा सस्सता अत्ता”ति च अत्थो दिस्सति ।

अथ असोको धम्मराजा सासनं विसोधेतुकामो मोग्गलिपुत्ततिस्सत्थेरस्स सन्तिके पठममेव समयं उगगण्हित्वा एकलद्धिके एकलद्धिके भिक्खू एकतो कारेत्वा एकमेकं भिक्खुसमूहं पक्कोसापेत्वा पुच्छि “किं वादी भन्ते सम्मासम्बुद्धो”ति । ततो ये ये “सम्मासम्बुद्धो सस्सतवादी”ति वा, “एकच्चसस्सतवादी”ति वा एवमादिना अत्तनो अत्तनो वादानुरूपं मिच्छावादं आहंसु, ते ते “नयिमे भिक्खू, अज्जतिथिया इमे”ति तथतो जत्वा तेसं सेतकानि वत्थानि दत्त्वा उप्पब्बाजेसि । ते सब्बेपि सट्ठिसहस्समत्ता अहेसुं ।

अथज्जे भिक्खू पुच्छित्वा तेहि “विभज्जवादी महाराज सम्मासम्बुद्धो”ति वुत्ते “सुद्धं दानि भन्ते सासनं, करोतु भिक्खुसङ्घो उपोसथ”न्ति वत्त्वा आरक्खञ्च दत्त्वा नगरं पाविसि । समग्गो सङ्घो सन्निपतित्वा उपोसथं अकासि । तस्मिं समागमे मोग्गलिपुत्ततिस्सत्थेरो यानि च तदा उप्पन्नानि वत्थूनि यानि च आर्यातिं उप्पज्जिस्सन्ति, सब्बेसम्पि तेसं पटिबाहनत्थं सत्थारा दिन्ननयवसेनेव तथागतेन ठपितमातिकं विभजन्तो परप्पवादमह्नं कथावत्थुं नाम अभिधम्मपिटके पञ्चमं पकरणं अभासि । ततो मोग्गलिपुत्ततिस्सत्थेरप्पमुखा तिपिटकपरियत्तिधरा पभिन्नपटिसम्भिदापत्ता सहस्सं भिक्खू थेरवादिनो सङ्गीतिद्वयारूळ्हं परिसुद्धं पोराणधम्मविनयं पुन सङ्गायित्वा सुरक्खितं रक्खिंसु [पारा० अट्ठ० १.ततियसङ्गीतिकथा] ।

अथ मोग्गलिपुत्तस्सत्थेरो नवसु पच्चन्तट्टानेसु सासनपटिट्ठापनत्थं नव नायकत्थेरे उच्चिनित्वा पेसेसि । तेसु अट्ठहि थेरेहि अत्तनो अत्तनो पत्तट्ठानं गन्त्वा बुद्धसासने पटिट्ठापिते **महामहिन्दत्थेरो** छत्तिसाधिकद्विसते (२३६) बुद्धवस्से जम्बुदीपतो सीहळदीपं गन्त्वा **देवानंपियतस्सराजप्पमुखं** दीपकजनसमूहं पसादेत्वा बुद्धसासनं सम्पत्तिट्ठापेसि, तेन च रज्जा दिन्नं **महामेघवनुय्यानं** पटिग्गहेत्वा तत्थ **महाविहारं** नाम सङ्घारामं पटिट्ठापेसि [पारा० अट्ठ० १.ततियसङ्गीतिकथा] । ततो पभुति सीहळदीपे बुद्धसासनं याव **वट्टगामणिराजकाला** निकायन्तरवादाकुलरहितं निम्मलं सुपरिसुद्धं हुत्वा समुज्जलित्थ । वट्टगामणिराजकालतो पन पट्ठाय निकायन्तरवादापि सीहळदीपमुपागमिसु । तदा **विसुद्धत्थेरेवादिनो** यथा पुराणधम्मविनयो तेहि निकायन्तरवादेहि असम्मिस्सो अमलीनो पकतिपरिसुद्धो हुत्वा तिट्ठेय्य, तथा तं महस्साहेन सुरक्खितं रक्खिसु । कथं?

अभयगिरिनिकायुप्पत्ति

वट्टगामणिराजा हि (४२५-बुद्धवस्से) रज्जं पत्वा पञ्चमासमत्तकाले **ब्राह्मणतस्सदामरिकेन** सत्तहि च दमिळयोधेहि उपट्ठतो सङ्गामे च पराजितो पलायित्वा साधिकानि चुद्धसवस्सानि निलीयित्वा अज्जतरवेसेन वसति [महावंसे ३३-परिच्छेदे ३७-गाथातो पट्ठाय] । तदा लङ्कादीपे मनुस्सा चोरभयेन दुब्भिकखभयेन च उपट्ठता भिक्खूनं चतूहि पच्चयेहि उपट्ठातुं न सक्कोन्ति, तेन भिक्खू येभुय्येन ततो जम्बुदीपं गन्त्वा धम्मविनयं धारेन्ता विहरन्ति । लङ्कादीपेयेव ओहीनापि थेरा यथालब्धेहि कन्दमूलपण्णेहि यापेन्ता काये वहन्ते निसीदित्वा परियत्तिधम्मं सज्झायं करोन्ति, अवहन्ते वालुकं उस्सापेत्वा तं परिवारेत्वा सीसानि एकट्ठाने कत्वा परियत्तिं सम्मसन्ति । एवं द्वादस संवच्छरानि साट्ठकथं तेपिटकं अहापेत्वा धारयिसु । यदा पन वट्टगामणिराजा दमिळराजानं हन्त्वा (४५५-४६६ बुद्धवस्सब्भन्तरे) पुनपि रज्जं कारेसि [महावंसे ३३, ७८-गाथा] । तदा ते थेरा जम्बुदीपतो पच्चागतत्थेरेहि सद्धिं तेपिटकं सोधेन्ता एकक्खरम्मि असमेन्तं नाम न पस्सिसु [अ० नि० अट्ठ० १.१.१३०; विभ० अट्ठ० ८१०] । योपि च **महानिद्देसो** तस्मिं काले एकस्सेव दुस्सीलभिक्खुनो पगुणो अहोसि, सोपि **महातिपिटकत्थेरेन महारक्खितत्थेरेन** तस्स सन्तिका उग्गण्हापेत्वा रक्खितो अहोसि [पारा० अट्ठ० २.५८५] । एवं दुब्भिकखरट्ठक्खोभुपद्वेहि पीळितत्ता दुद्धरसमयेपि धम्मविनयं सक्कच्चं धारयिसु ।

राजा **अभयगिरिं** नाम विहारं कारेत्वा अत्तनो कतूपकारपुब्बस्स **महातिस्सत्थेरस्स** अदासि । सो पन थेरो कुलसंसग्गबहुलत्ता महाविहारवासीहि भिक्खूहि पब्बाजनीयकम्मं कत्वा नीहटो । तदास्स सिससो **बहलमस्सुतिस्सनामको** थेरो तं कम्मं पटिबाहि, तेनस्स सङ्घो उक्खेपनीयकम्मं अकासि । सो महाविहारवासीनं कुज्झित्वा अभयगिरिविहारमेव गन्त्वा तेन महातिस्सत्थेरेन एकतो हुत्वा विसुं गणं वहन्तो वसि । ते च द्वे थेरा न महाविहारं पुनागमिसु [महावंसे ३३, ७९-गाथादीसु । निकायसङ्गहे] । ततो पट्ठाय सीहळदीपे महाविहारवासी, अभयगिरिवासीति द्वे निकायाजाता । इदं ताव सीहळदीपे सासनपरिहानिया पठमं कारणं ।

धम्मरुचिनिकायुप्पत्ति

तदा च राजा अभयगिरिवासीसुयेव भिक्खूसु विसेसतो पसन्नो हुत्वा तेयेव चतूहि पच्चयेहि पवारेत्वा पग्गण्हाति, राजमहामत्तादयोपि अभिज्जाता अभिज्जाता बहू जना तस्मिज्च आरामे अज्जत्थ च बहू आवासे कत्वा तेसं देन्ति । एवं अभयगिरिवासिनो भिक्खू बहूनां अभिज्जातजनानं सक्कता चेव होन्ति पूजिता च मानिता च । पुन च अभयगिरिवासिनो बहलमस्सुतिस्सत्थेरादयोइन्दियरट्ठतो आगतं वज्जिपुत्तकगणपरियापन्नस्स धम्मरुचिनिकायस्स धम्मविनयभूतं

सक्कतभासारोपितं अभिनवम्पि पिटकं सम्पटिच्छन्ति [महावंसे ३३, ९९ गाथासु। निकायसङ्गहे], तेन तेषि धम्मरुचिनिकायिका नाम अहेसुं। इदं सीहळदीपे सासनपरिहानिया दूतियं कारणं।

पिटकत्तयस्स पोत्थकारोपनं

महाविहारवासिनो पन पोरणिकं पाळिभासाय सण्ठितं परिसुद्धपिटकमेव पटिगणहन्ति, तच्च मुखपाठेनेव धारेन्ति। तदा पन थेरा पच्छिमजनानं सतिपज्जाहानिं दिस्वा बुद्धकालतो पट्टाय याव तं काला मुखपाठेनाभतं साट्ठकथं पिटकत्तयं पोत्थके आरोपेतुं समारभिसु। समारभमाना च ते अनुराधराजधानिपुरतो अट्ठसट्ठिमिलप्पमाणे मलयजनपदे मातुल [मातले इति एतरहि वोहारो] नगरे आलोकलेणे वसन्ता एकस्स तन्देसिकस्स जनपदाधिपतिनो आरक्खं गहेत्वा तं पोत्थकारोपनकम्ममकंसु [महावंसे ३३, १००-१०१-गाथासु]। तेनदं जायति “तदा महाविहारवासिनो थेरा राजराजमहामत्तेहि अलद्धूपकारा हुत्वा अत्तनो बलेनेव पिटकत्तयस्स पोत्थकारोपनकम्ममकंसू”ति च, “तच्च यथेव पच्छिमजनानं सतिपज्जाहानिं दिस्वा कतं, तथेव दुब्भिकखरट्ठकखोभादिभयुपट्ठुतकालेसु दुद्धरभावम्पि दिस्वा”ति च, तथा “अभयगिरिवासीनं सम्पटिच्छितसमयन्तरवादेहि अनाकुलनत्थम्पि कत”न्ति च। एवं महाविहारवासिनो थेरा परिसुद्धत्थेरवादपिटकं समयन्तरेहि असम्मिस्सनत्थाय यथा पुरे, तथा पाळिभासाय एव पोत्थके आरोपेत्वापि सुरक्खितं रक्खिसु। यदि हि तदा तेपिटकं पोत्थकेसु अनारोपितमस्स, पच्छाकालेसु समयन्तरतो आगतसुत्तानि “नेतानि अम्हाक”न्ति पटिक्खिपितुं न सुकरानि भवेय्युं। यतो च खो तदा साट्ठकथं तेपिटकं पोत्थकेसु आरोपितं, ततोयेव अनागतकालेसु समयन्तरागतसुत्तानि तेहि पोत्थकेहि संसन्देत्वा पटिक्खिपितुं सुकरानि होन्ति।

तथा हि भातियराजकाले (५२४-५५२-बु-व) महाविहारवासीनं अभयगिरिवासीहि विनये विवादो उप्पज्जि। तदा राजा दीघकारायनं नाम ब्राह्मणजातिकं अमच्चं थेरानं सन्तिकं पेसेसि। सो उभिनं सुत्तं सुत्वा विनिच्छयं अदासि [पारा० अट्ठ० २.३८४]। तथा वोहारकतिस्सरजकाले च (७५८-७८० बु-व) गोठाभयरजकाले च (७९७-८१० बु-व) थेरवादिका पोत्थकारूळहेन धम्मविनयेन संसन्देत्वा अधम्मवादं पटिक्खिपिसु [निकायसङ्गहे १२-पिट्ठे]।

अधम्मवादुप्पत्ति

अयं पन आदितो पट्टाय सासनमलभूतानं अधम्मवादानं उप्पत्ति। असोकरज्जो हि काले उप्पब्बाजेत्वा निक्कट्ठिता अज्जतिथिया बुद्धसासने अलद्धपतिट्ठा कोधाभिभूता पाटलिपुत्ततो निक्खमित्वा राजगहसमीपे नालन्दायं सन्निपतित्वा एवं सम्मन्तयिसु “महाजनस्स बुद्धसासने अनवगाहत्थाय सक्क्यानं धम्मविनयो नासेतब्बो, तच्च खो तेसं समयं अजानन्तेहि न सक्का कातुं, तस्मा येन केनचि उपायेन पुनपि तत्थ पब्बजितब्बमेवा”ति। ते एवं सम्मन्तयित्वा पुन आगन्त्वा विसुद्धत्थेरवादीनमन्तरं पविसितुं असक्कोन्ता तदज्जेसं सत्तरसन्नं महासङ्घिकादिनिकायानं सन्तिकं उपसङ्गमित्वा अत्तनो अज्जतिथियभावं अजानापेत्वा पब्बजित्वा पिटकत्तयमुगगणित्वा तच्च विपरिवत्तेत्वा ततो कोसम्भिं गन्त्वा धम्मविनयनासनाय उपायं मन्तयित्वा २५३-बुद्धवस्से छसु ठानेसु वसन्ता (१) हेमवतिको (२) राजगिरिको (३) सिद्धत्थिको (४) पुब्बसेलियो (५) अपरसेलियो (६) वाजिरियो (७) वेतुल्लो (८) अन्धको (९) अज्जमहासङ्घिकोति नव अभिनवे निकाये उप्पादेसु [निकायसङ्गहे ९-पिट्ठे]। तेसं नामानि च लद्धियो च कथावत्थुअट्ठकथायं आगतायेव।

तेसु हेमवतिका सद्धम्मपतिरूपकं बुद्धभासितभावेन दस्सेत्वा

(१) वण्णपिटकं नाम गन्थं अकंसु ।

राजगिरिका (२) अङ्गुलिमालपिटकं,

सिद्धत्थिका (३) गूळहवेस्सन्तरं,

पुब्बसेलिया (४) रट्टपालगज्जितं,

अपरसेलिया (५) आळवकगज्जितं,

वजिरपब्बतवासिनो वाजिरिया (६) गूळहविनयं नाम गन्थं अकंसु ।

तेयेव सब्बे मायाजालतन्त-समाजतन्तादिके अनेके तन्तगन्थे च, मरीचिकप्प-हेरम्भकप्पादिके अनेके कप्पगन्थे च अकंसु ।

वेतुल्लवादिनो पन (७) वेतुल्लपिटकमकंसु ।

अन्धका च (८) रतनकूटादिके गन्थे,

अज्जमहासङ्घिका च (९) अक्खरसारियादिसुत्तन्ते अकंसु [निकायसङ्गहे ९-पिट्ठे] ।

तेसु पन सद्धम्मपतिरूपकेसु वेतुल्लवादो, वाजिरियवादो, रतनकूटसत्थन्ति इमानियेव तीणि लङ्कादीपमुपागतानि, अज्जानि पन वण्णपिटकादीनि जम्बुदीपेयेव निवत्तन्तीति निकायसङ्गहे वुत्तं । वण्णपिटकादीनम्पि पन लङ्कादीपमुपागतच्छाया दिस्सतेव । तथा हि समन्तपासादिकाय विनयट्ठकथायं (३, ९-पिट्ठे)

“वण्णपिटक अङ्गुलिमालपिटकरट्टपालगज्जितआळवकगज्जितगूळहमग्गगूळहवेस्सन्तरं गूळहविनय वेदल्लपिटकानि [एत्थं “वेपुल्लं, वेदल्लं, वेतुल्लन्ति अत्थको एकं, बोधिसत्तपिटकस्सेव नाम”न्ति वेदितब्बं । तथा हि वुत्तं असङ्गेन नाम आचरियेन अभिधम्मसमुच्चये नाम महायानिकगन्ते (७९-पिट्ठे) “वेपुल्लं कतमं? बोधिसत्तपिटकसम्पयुत्तं भासितं । यदुच्चते वेपुल्लं, तं वेदल्लमप्युच्चते, वेतुल्लमप्युच्चते । किमत्थं वेपुल्लमुच्चते? सब्बसत्तानं हितसुखाधिद्वानतो, उदारगम्भीरधम्मदेसनातो च । किमत्थमुच्चते वेदल्लं? सब्बावरणविदलनतो । किमत्थमुच्चते वेतुल्लं? उपमानधम्मानं तुलनाभावतो”ति] पन अबुद्धवचनानियेवाति वुत्तं”न्ति च ।

सारत्थप्पकासिनिया संयुत्तट्ठकथायम्पि (२, १८६-पिट्ठे)

“गूळहविनयं गूळहवेस्सन्तरं गूळहमहोसधं वण्णपिटकं अङ्गुलिमालपिटकं रट्टपालगज्जितं आळवकगज्जितं वेदल्लपिटकन्ति अबुद्धवचनं सद्धम्मपतिरूपकं नामा”ति च—

तेसं पटिक्खेपो दिस्सति । न हि तानि असुत्वा, तेसज्च अत्थं अजानित्वा सीहळट्ठकथाचरियेहि तानि पटिक्खिपितुं

सक्का, नापि तं पटिक्खेपवचनं जम्बुदीपिकट्टकथाचरियानं वचनं भवितुं, महामहिन्दत्थेरस्स सीहळदीपं गमनसमये तेसंयेव अभावतो। तस्मा तानि च तदज्जानि च महायानिकपिटकानि तंकालिकानि येभ्य्येन सीहळदीपमुपागतानीति गहेतब्बानि। तेसु च **वज्जिपुत्तकगणपरियापन्नस्स धम्मरुचिनिकायस्स** पिटकानं तदुपागमनं पुब्बेव वुत्तं। तदज्जेसं पन तदुपागमनं एवं वेदितब्बं।

वेतुल्लवादस्स पठमनिग्गहो

वोहारकतिस्सरज्जो काले (७५८-७८०-बु-व) अभयगिरिवासिनो धम्मरुचिनिकायिका पुब्बे वुत्तप्पकारेन सासनविनासनत्थाय भिक्खुवेसधारीहि वेतुल्लवादिब्राह्मणेहि रचितं वेतुल्लपिटकं सम्पटिग्गहेत्वा “इदं बुद्धभासित”न्ति दस्सेन्ति। तं महाविहारवासिनो थेरवादिका धम्मविनयेन संसन्देत्वा अधम्मवादोति पटिक्खिपिंसु। तं सुत्वा राजा सब्बसत्थपारगुं **कपिलं** नाम अमच्चं पेसेत्वा विनिच्छयं कारापेत्वा अबुद्धभासितभावं जत्वा सब्बं वेतुल्लपोत्थकं ज्ञापेत्वा तल्लब्धिके च पापभिक्खू निग्गहेत्वा बुद्धसासनं जोतेसि [\[निकायसङ्गहे १२-पिट्ठे\]](#)। वुत्तज्हेतं महावंसे —

३६-४ **वेतुल्लवादं** मदित्वा, कारेत्वा पापनिग्गहं।
कपिलेन अमच्चेन, सासनं जोतयी च सो”ति॥

सागलियनिकायुप्पत्ति

पुनपि ते अभयगिरिवासिनो **गोठाभयरज्जो** काले (७९७-८१०-बु-व) वेतुल्लवादं तथेव दस्सेन्ति। तदा पन तेसु **उस्सिलियातिस्सो** नाम महाथेरो **वोहारकतिस्सर**राजकाले वेतुल्लवादीनं भिक्खूनं कतनिग्गहं सुत्वा “विचारणसम्पन्नस्स रज्जो समये तथेव भवेय्य, न भद्दकमेत”न्ति चिन्तेत्वा “न मयं तेहि एकतो होमा”ति तिसतमत्ते भिक्खू गहेत्वा दक्खिणगिरिविहारं गन्त्वा **धम्मरुचिनिकाय**तो विसुं हुत्वा वसि। तेसु **सागलो** नाम महाथेरो तथेव दक्खिणगिरिम्हि वसन्तो आगमब्याख्यानमकासि। ततो पट्ठाय तं थेरमारब्ध तस्सन्तेवासिनो **सागलिया** नाम अहेसुं। तेसम्पि वादो पच्छा **महासेनराजकाले जेतवनविहारे** पत्थरि [\[निकाय १३-पिट्ठे\]](#)।

वेतुल्लवादस्स दुतियनिग्गहो

गोठाभयो पन राजा पच्चसु [\[महाविहार, चेतिय, थूपाराम, इस्सरसमणक, वेस्सगिरिविहारसङ्घातेसु\]](#) विहारेसु महाभिक्खुसङ्घं एकतो सन्निपातेत्वा तं पवत्तिं पुच्छित्वा वेतुल्लवादस्स अबुद्धभासितभावं जत्वा तंवादिनो सट्ठि पापभिक्खू लक्खणाहते कत्वा रट्ठतो पब्बाजेसि, वेतुल्लपोत्थकानि च ज्ञापेत्वा बुद्धसासनं जोतेसि [\[महावंसे ३६, १११-११२-गाथासु, निकाय १३-पिट्ठे\]](#)।

तदा रट्ठतो पब्बाजितेसु तेसु भिक्खूसु केचि **कावीरपट्टनं** गन्त्वा तत्थ वसन्ति। तस्मिञ्च समये एको अज्जतित्थियमाणवको देसन्तरतो कावीरमागन्त्वा पट्टनगामिकेहि तेसं भिक्खूनं कतूपहारं दिस्वा लाभसक्कारं निस्साय तेसं सन्तिके पब्बजित्वा **सङ्गमित्तो**ति नामेन पाकटो अहोसि। सो महाविहारवासीनं धम्मविनिच्छयं निस्साय गोठाभयरज्जो वेतुल्लवादहेतु तेसं भिक्खूनं रट्ठा पब्बाजितभावं जत्वा महाविहारवासीनं कुद्धो हुत्वा “वेतुल्लवादं वा ने गाहापेस्सामि,

विहारे वा नेसं उम्मूलेत्वा विनासेस्सामी”ति सीहळदीपं गन्त्वा राजानं पसादेत्वा तस्स द्वे पुत्ते सिप्पं सिक्खापेस्सामीति आरभि । तथापि अत्तनो वादस्स जाननसमत्थं **जेट्टुतिस्सं** ओहाय अनागते अत्तनो वचनं कारापेतुं सक्कुण्यं कनिट्ठं **महासेनकुमारमेव** सङ्गणिहत्वा सिप्पं सिक्खापेसि । वितुनो अच्चयेन जेट्टुतिस्सकुमारे रज्जं पत्ते (८१०-८१९-बु-व) सो तस्स रज्जो भीतो कावीरपट्टनमेव गतो **[महावंसे ३६, ११३-गाथादीसु, निकाय १४-पिट्ठे]** ।

महासेनरज्जो पन काले (८१९-८४५-बु-व) सो पुन सीहळदीपमागन्त्वा **अभयगिरिविहारे** वसन्तो महाविहारवासीहि वेतुल्लवादं गाहापेतुं नानापकारेहि वायाममकासि । तथापि तेहि तं गाहापेतुं असक्कोन्तो राजानं उपसङ्कमित्वा नानाकारणेहि सज्जापेत्वा “यो कोचि एकस्सपि भिक्खुस्स महाविहारवासिनो आहारं ददेय्य, तस्स सतं दण्डो”ति रज्जो आणाय नगरे भेरिं चरापेसि । तदा महाविहारवासिनो नगरे पिण्डाय चरन्ता तयो दिवसे भिक्खुमलद्वा महापासादे सन्निपतित्वा “सचे मयं खुदाहेतु अधम्मं धम्मोति गणहेय्याम, बहू जना तं गहेत्वा अपायगामिनो भविस्सन्ति, मयञ्च सब्बे सावज्जा भविस्साम, तस्मा न मयं जीवितहेतुपि वेतुल्लवादं पटिग्गणिहस्सामा”ति सम्मन्तयित्वा महाविहारादिके सब्बविहारे छट्टेत्वा **रोहणजनपदञ्च मलयपदेसञ्च** अगमिंसु **[महावंसे ३७, २-६-गाथासु । निकायसङ्गहे १४-पिट्ठे]** ।

वेतुल्लवादो

कीदिसो **वेतुल्लवादो** नाम, यतो महाविहारवासिनो अतिविय जिगुच्छिंसूति? इदानीं वेतुल्लवादस्स सरूपं सब्बाकारेण पकासेतुं न सक्का, वेतुल्लनामेन पोत्थकानं वा निकायस्स वा एतरहि अपाकटभावतो । अभिधम्मपिटके पन कथावत्थुअट्ठकथायं **[कथा० अट्ठ० ७९३-७९४ आदयो]** कतिपया वेतुल्लवादा आगता । कथं? —

“परमत्थतो मग्गफलानेव सङ्गो, मग्गफलेहि अज्जो सङ्गो नाम नत्थि, मग्गफलानि च न किञ्चि पटिग्गणहन्ति, तस्मा न वत्तब्बं सङ्गो दक्खिणं पटिग्गणहाती”ति च (१) ।

“मग्गफलानेव सङ्गो नाम, न च तानि दक्खिणं विसोधेतुं सक्कोन्ति, तस्मा न वत्तब्बं सङ्गो दक्खिणं विसोधेती”ति च (२) ।

“मग्गफलानेव सङ्गो नाम, न च तानि किञ्चि भुज्जन्ति, तस्मा न वत्तब्बं सङ्गो भुज्जति पिवति खादति सायती”ति च (३) ।

मग्गफलानेव सङ्गो नाम, न च सक्का तेसं किञ्चि दातुं, न च तेहि पटिग्गणिहतुं, नापि तेसं दानेन कोचि उपकारो इज्झति, तस्मा न वत्तब्बं सङ्गस्स दिन्नं महप्फल”न्ति च (४) ।

“बुद्धो भगवा न किञ्चि परिभुज्जति, लोकानुवत्तनत्थं पन परिभुज्जमानं विय अत्तानं दस्सेति, तस्मा निरुपकारत्ता न वत्तब्बं तस्मिं दिन्नं महप्फल”न्ति च (५) ।

“भगवा तुसितभवने निब्बत्तो तत्थेव वसति, न मनुस्सलोकं आगच्छति, निम्मितरूपमत्तकं पनेत्थ दस्सेती”ति च (६) ।

“तुसितपुरे ठितो भगवा धम्मदेसनत्थाय अभिनिम्मितं पेसेसि, तेन चेव, तस्स च देसनं सम्पटिच्छित्वा आयस्मता

आनन्देन धम्मो देसितो, न बुद्धेन भगवता”ति च (७) ।

“एकाधिष्ठायेन मेथुनो धम्मो पटिसेवितब्बो । अयं पनेत्थ अत्थो — कारुज्जेन वा एकेन अधिष्ठायेन एकाधिष्ठायो, संसारे वा एकतो भविस्सामाति इत्थिया सद्धिं बुद्धपूजादीनि कत्वा पण्णिवसेन एको अधिष्ठायो अस्साति एकाधिष्ठायो, एवरूपो द्विन्नम्पि जनानं एकाधिष्ठायो मेथुनो धम्मो पटिसेवितब्बो”ति च (८) एवं वेतुल्लवादीनं लद्धियो आगता, एत्तकायेव नेसं वादा थेरवादगन्थवसेन दानि पज्जायन्ति ।

एत्थ च आदितो चतूहि वादेहि सुत्तन्तागतसङ्घो च मिच्छा गहितो, विनयागतसङ्घो च सब्बथा पटिक्खित्तो । तदनन्तरं तयो वादा इस्सरनिम्मानवादानुवत्तका । अन्तिमस्स पन असद्धम्मवादभावो अतिविय पाकटोति ।

अभिधम्मसमुच्चये पन वेतुल्लपिटकस्स बोधिसत्तपिटकभावो पकासितो, तस्मा सद्धम्मपुण्डरिकसुत्तादिके बोधिसत्तपिटके आगतवादोपि “वेतुल्लवादो”ति वेदितब्बो [अभिधम्मसमुच्चये ७९-पिट्ठे] ।

महाविहारनासनं

महाविहारवासीसु पन वुत्तप्पकारेण सब्बविहारे छडुत्वा गतेसु सङ्घमित्तो पापभिक्खु राजानं सज्जापेत्वा लोहपासादादिके चतुसट्ठ्याधिके तिसतमत्ते परिवेणपासादे नासेत्वा समूलं उद्धरापेत्वा अभयगिरिविहारं आनयापेसि । विहारभूमियञ्च कसापेत्वा अपरण्णे वपापेसि । एवं तदा महाविहारो नव वस्सानि भिक्खूहि सुज्जो अहोसि आवासविरहितो च । अथ राजा **मेघवण्णाभयस्स** नाम कल्याणमित्तभूतस्स अमच्चस्स सन्तज्जनपुब्बङ्गमेन वचनेन महाविहारं पुन पाकतिकं कत्वा ते चापि अपक्कन्ते भिक्खू आनेत्वा चतूहि पच्चयेहि उपट्ठहि [महावंसे ३७-३०-गाथासु । निकायसङ्गहे १४-१५-पिट्ठेसु] ।

जेतवनवासिनिकायुप्पत्ति

पुनपि राजा **दक्खिणारामवासिम्हि** जिम्हमानसे **कुहकतिस्सत्थेरे** पसन्नो हुत्वा तस्सत्थाय महाविहारसीमब्भन्तरे **जोतिवनुय्याने** जेतवनविहारं कारेतुमारभि । महाविहारवासिनो भिक्खू तं निवारेतुं असक्कोन्ता पुनपि ततो अपक्कमिंसु । तदापि महाविहारो नव मासानि भिक्खूहि सुज्जो अहोसि । राजा पन अत्तनो अज्झासयवसेनेव तत्थ **जेतवनविहारं** कारेत्वा तस्स कुहकतिस्सत्थेरस्स अदासियेव । तत्थ दक्खिणगिरिविहारतो **सागलिया** भिक्खू आगन्त्वा वसिंसु । पच्छा च ते **अम्बसामणेसिलाकालरज्जो** काले (१०६७-१०८०-बु-व) वेतुल्लवादीनो अहेसुं [महावंसे ३७, ३२-गाथादीसु, निकायसङ्गहे १५-पिट्ठे] ।

एवं आचरियबुद्धघोसत्थेरस्स सीहळदीपमागमनकालतो (९६५-बु-व) पुब्बेयेव विसुद्धत्थेरवादीहि महाविहारवासीहि विरुद्धसमया **अभयगिरिवासिनो** (४५५-बु-व) **सागलिया** (७९७-८१०-बु-व) **जेतवनवासिनो** (८२९-८४५-बु-व) चाति तयो निकाया उप्पन्ना अहेसुं । तेसु पन अभयगिरिवासिनोयेव विसेसतो पाकटा चेव होन्ति बलवन्तो च । तथा हि ते विसुद्धत्थेरवादपिटकञ्च वज्जिपुत्तकपरियापन्नधम्मरुचिनिकायपिटकञ्च महिसासकादिनिकायपिटकञ्च महायानपिटकञ्च सम्पटिच्छन्ति । तेसु धम्मरुचिनिकायपिटकस्स सम्पटिच्छितभावो पाकटोयेव । महिसासकादिनिकायपिटकस्स सम्पटिच्छितभावो पन **फाहियन्नामस्स** चिनभिक्खुनो अद्धानक्कमसल्लक्खणकथाय चेव

अट्टकथासु पटिक्खित्तवण्णपिटकादिनामवसेन च वेदितब्बो, तथा महायानपिटकस्स सम्पटिच्छितभावोपि ।

फाहियमब्धानक्कमकथा

फाहियन्नामेन हि चिनभिक्षुना ९५६-बुद्धवस्से सीहळदीपतो सक्कतभासारोपितं महिसासकविनयपिटकञ्च दीघागमो च संयुत्तागमो च सन्निपातपिटकञ्च अत्तना सह चिनरट्टमानीतन्ति तस्स अब्धानक्कमकथायं दस्सितं । तञ्च सब्बं अभयगिरिविहारतोयेव लद्धमस्स, महाविहारवासीनं सक्कतारोपितपिटकाभावतो । अट्टकथायं पटिक्खित्तवण्णपिटकादीनि च तत्थेव भवेय्युं, महाविहारवासीहि तेसं अप्पटिग्गहितभावतो । तथा “फाहियम्भिक्षुस्स सीहळदीपे पटिवसनकाले (९५४-९५६-बु-व) महाविहारे तिसहस्समत्ता भिक्षू वसन्ति, ते थेरवादपिटकमेव उगगण्हन्ति, न महायानपिटकं । अभयगिरिविहारे पञ्चसहस्समत्ता भिक्षू वसन्ति, ते पन द्वेपि पिटकानि उगगण्हन्ति महायानपिटकञ्चेव थेरवादपिटकञ्चा”ति च तेनेव चिनभिक्षुना दस्सितं ।

यस्मा पन अभयगिरिवासिनो महायानपिटकम्पि उगगण्हन्ति, तस्मा तस्मिं विहारे महायानिकानं पधानाचरियभूतेहि अस्सघोसनागज्जुनेहि कतगन्थापि संविज्जमानायेव भवेय्युं, ततोयेव तेसं नयञ्च नामञ्च आचरियबुद्धघोसत्थेरोपि अज्जेपि तंकालिका महाविहारवासिनो सुतसम्पन्ना थेरा जानेय्युंयेव । अपिच दक्खिणइन्दियरट्टे समुद्दसमीपे गुन्ताजनपदे नागारजुनकोण्डं नाम ठानमत्थि, यत्थ नागज्जुनो महायानिकानं पधानाचरियभूतो वसन्तो बुद्धसासनं पतिट्ठापेसि । आचरियबुद्धघोसस्स च तन्देसिकभावनिमित्तं दिस्सति, तं पच्छतो (३३-पिट्ठे) आविभवस्सति । तस्मापि आचरियबुद्धघोसत्थेरो नागज्जुनस्स च अस्सघोसस्स च नयञ्च नामञ्च जानेय्ययेवाति सक्का अनुमिनितुं ।

जानतोयेव पन तेसं नयस्स वा नामस्स वा अत्तनो अट्टकथायमप्पकासनं तेसं निकायन्तरभावतोयेवस्स । तथा हि तेसं अस्सघोसनागज्जुनानं अस्सघोसो [(५७०-६७०-बुद्धवस्सब्भन्तरे)] थेरवादतो भिन्नेसु एकादससु गणेषु सब्बत्थिवादगणे परियापन्नो, नागज्जुनो च महासङ्घिक-चेतियवादिगणादीहि जाते महायाननिकाये परियापन्नो, महाविहारवासिनो च आदितोयेव पट्ठाया निकायन्तरसमयेहि असम्मिस्सनत्थं अत्तनो पिटकं अतीव आदरं कत्वा रक्खन्ति, अयञ्च आचरियबुद्धघोसो तेसमज्जतरो । वुत्तहि तस्स गन्थनिगमनेसु “महाविहारवासीनं वंसालङ्कारभूतेना”ति । तस्मा “आचरियबुद्धघोसो तेसं नयं जानन्तोयेव अत्तनो गन्थेसु निकायन्तरसमयेहि असम्मिस्सनत्थं नप्पकासेसी”ति वेदितब्बं ।

एत्तावता च यानि “बोधिमण्डसमीपम्हि, जातो ब्राह्मणमाणवो”तिआदिना वुत्तस्स महावंसवचनस्स विचारणमुखेन आचरियबुद्धघोसस्स वम्भनवचनानि धम्मानन्दकोसम्बिना वुत्तानि, तानि अमूलकभावेन अनुविचारितानि । तथापि “आचरियबुद्धघोसो बोधिमण्डसमीपे जातो”ति एतं पन अत्थं साधेतुं दळ्ळकारणं न दिस्सतेव ठपेत्वा तं महावंसवचनं, यम्पि बुद्धघोसुप्पत्तियं वुत्तं, तम्पि महावंसमेव निस्साय वुत्तवचनत्ता न दळ्ळकारणं होतीति ।

मरम्मरट्टिकभावकथा

एकच्चे पन मरम्मरट्टिका “आचरियबुद्धघोसो मरम्मरट्टे सत्थुं नाम नगरतो सीहळदीपं गन्त्वा सङ्गहट्टकथायो अकासी”ति वदन्ति । तं धम्मानन्देन अनुजानित्वा “तम्पि थोकं युत्तिसम्पन्नं, अहं एवं सद्वहामि ‘बुद्धघोसो

दक्खिणइन्दियरट्ठे तेलङ्गजातिको'ति, तेलङ्गजातिका च बहू जना मरम्मरट्ठे च इन्दोचिन रट्ठे च गन्त्वा वसन्ति, तल्लिड? इति वोहारो च ततोयेव तेलङ्गपदतो उप्पन्नो । तथा 'बुद्धघोसो अट्ठकथायो कत्वा सीहळदीपतो मरम्मरट्ठं गन्त्वा पच्छिमभागे तत्थेव वसी'तिपि गहेतुं सक्का, तस्स हि गन्था मरम्मरट्ठे सीहळरट्ठतोपि सुरक्खिततरा होन्ती'ति च वत्वा पतिट्ठापितं ।

दक्खिणइन्दियरट्ठिकभावयुत्ति

बहू पन आधुनिका विचक्खणा धम्मानन्दादयो “आचरियबुद्धघोसत्थेरो दक्खिणइन्दियरट्ठिको”ति वदन्ति । अयं पनेत्थ युत्ति, येभुय्येन हि अट्ठकथाटीकाकारा थेरा दक्खिणइन्दियरट्ठिकायेव । तथा हि बुद्धवंसट्ठकथाय च अभिधम्मावतारट्ठकथाय च विनयविनिच्छयट्ठकथाय च कारको आचरियबुद्धदत्तत्थेरो चोळरट्ठे तम्बपण्णिनदियं उरगनगरे जातो आचरियबुद्धघोसेन एककालिको च । परमत्थविनिच्छय-नामरूपपरिच्छेद-अभिधम्मत्थसङ्गहानं कारको आचरियअनुरुद्धत्थेरो [एकच्चे पन वदन्ति-परमत्थविनिच्छयकारको एको, नामरूपपरिच्छेदअभिधम्मत्थसङ्गहानं कारको एकोति द्वे अनुरुद्धत्थेराति] कज्जिवररट्ठे कावेरिनगरजातिको । खुद्वकनिकायपरियापन्नउदानादिपाळिया संवण्णनाभूताय परमत्थदीपनिया कारको आचरियधम्मपालत्थेरोपि दक्खिणइन्दियरट्ठे कज्जिपुरजातिको । तथेवायम्पीति वेदितब्बो । वुत्तज्जि मनोरथपूरणिया नाम अङ्गुत्तरट्ठकथाय निगमने —

“आयाचितो सुमतिना, थेरेन भदन्तजोतिपालेन ।
कज्जिपुरादीसु मया, पुब्बे सद्धिं वसन्तेना”ति ॥

एत्थ च कज्जिपुरं नाम मदरसनगरस्स ईसकं पच्छिमनिस्सिते दक्खिणदिसाभागे पञ्चचत्तालीसमिलप्पमाणे पदेसे इदानि कज्जीवर इति वोहरितनगरमेव ।

तथा पपञ्चसूदनिया नाम मज्झिमट्ठकथाय निगमनेपि —

“आयाचितो सुमतिना, थेरेन बुद्धमित्तेन ।
पुब्बे मयूरदूत [मयूररूप (सी०), मयूरसुत्त (स्या०)] पट्टनम्हि सद्धिं वसन्तेना”ति — वुत्तं ॥

एत्थ च मयूरदूतपट्टनं नाम इदानि मदरसनगरसमीपे मिलपोर इति वोहरितट्ठानन्ति पोराणप्पवत्तिगवेसीहि वुत्तं ।

इमाहि पन निगमनगाथाहि दक्खिणइन्दियरट्ठेयेव निवुत्थपुब्बतं पकासेति, बोधिमण्डसमीपे वा, मरम्मरट्ठे वा निवुत्थपुब्बताय पकासनञ्च न दिस्सति । तेन आचरियबुद्धघोसो दक्खिणइन्दियरट्ठिको न होतीति न सक्का पटिक्खिपितुं ।

समन्तपासादिकायम्पि विनयट्ठकथायं (३, १३) आचरियेन एवं वुत्तं —

“यं पन अन्धकट्ठकथायं ‘अपरिक्खित्ते पमुखे अनापत्तीति भूमियं विना जगतिया पमुखं सन्धाय कथित’न्ति वुत्तं, तं अन्धकरट्ठे पाटेक्कसन्निवेसा एकच्छदना गब्भपाळियो सन्धाय वुत्त’न्ति ।

इमिना पन वचनेन “अन्धकट्ठकथा अन्धकरट्ठिकेहि थेरेहि कता”ति पाकटा होति, आचरियबुद्धघोसोपि च

अन्धकटुकथाय सन्धायभासितम्पि तन्देसिकगब्भपाळिसन्निवेसाकारम्पि सुद्धु जानाति, तस्मा तन्देसिको न होतीति न सक्का वत्तुन्ति ।

तथा इमस्सपि विसुद्धिमग्गस्स निगमने — “**मोरण्डखेटकवत्तब्बेना**”ति वुत्तं । एत्थ च **खेटो**ति पदस्स गामोति वा, जानपदानं कस्सकानं निवासोति वा, खुद्धकनगरन्ति वा तयो अत्था सक्कताभिधाने पकासिता, दक्खिणइन्दियरट्टेसु च यावज्जतनापि गामो **खेडा**ति वोहरीयति । तस्मा मोरण्डक्खये खेटे जातो मोरण्डखेटको, मोरण्डखेटको इति वत्तब्बो मोरण्डखेटकवत्तब्बो, तेन मोरण्डखेटकवत्तब्बेनाति वचनत्थं कत्वा “मोरण्डगामे जातोति वत्तब्बेन थेरेना”ति अत्थो गहेतब्बो । इदानीं पन दक्खिणइन्दियरट्टे **गुन्ताजनपदे** नागारजुनकोण्डतो एकपण्णासमिलमत्ते (५१) अमरवतितो च अट्टपण्णासमिलमत्ते (५८) पदेसे **कोतनेमलिपुरी**ति च **गुन्दलपल्ली**ति च वोहरितं ठानद्वयमत्थि, तत्थ च बहूनि बुद्धसासनिकपोराणसन्तकानि दिट्ठानि, **नेमली**ति तेलगुवोहारो च मोरस्स, **गुन्दलु** इति च अण्डस्स, तस्मा तं ठानद्वयमेव पुब्बे **मोरण्डखेटो**ति वोहरितो **आचरियबुद्धघोसस्स जातिगामो** भवेय्याति पोराणट्ठानगवेसीहि गहितो । यस्मा पनेतं “मोरण्डखेटकवत्तब्बेना”ति पदं “मोरण्डगामजातेना”ति पदं विय पाळिनयानुच्छविकं न होति, अज्जेहि च बहूहि विसेसनपदेहि एकतो अट्टत्वा विसेस्यपदस्स पच्छतो विसुं ठितं, आगमट्टकथादीसु च न दिस्सति, तस्मा एतं केनचि तं कालिकेन आचरियस्स जातिट्ठानं सज्जानन्तेन पक्खित्तं विय दिस्सतीति ।

इमेसु पन तीसु “आचरियबुद्धघोसो बोधिमण्डसमीपे जातोति च मरम्मरट्टिकोति च दक्खिणइन्दियरट्टिको”ति च वुत्तवचनेसु पच्छिममेव बलवतरं होति आचरियस्सेव वचननिस्सितत्ता, तस्मा तदेव निस्साय आचरियबुद्धघोसत्थेरस्स उप्पत्ति एवं वेदितब्बा ।

आचरियबुद्धघोसत्थेरस्स अट्टुप्पत्ति

आचरियबुद्धघोसो दसमे बुद्धवस्ससतके (९०१-१०००-बु-व) **दक्खिणइन्दियरट्टे मोरण्डगामे** ब्राह्मणकुले जातो, सो तीसु वेदेसु चेव सब्बविज्जासिप्पगन्थेसु च पारङ्गतो हुत्वा बुद्धसासनधम्मं सुत्वा तम्पि उग्गण्हितुकामो तस्मिंयेव दक्खिणइन्दियरट्टे एकस्मिं थेरवादिकविहारे **महाविहारवासीनं** रेवतत्थेरप्पमुखानं भिक्खूनां सन्तिके पब्बज्जञ्चेव उपसम्पदञ्च गण्हित्वा **पिटकत्तयपाळिमुग्गण्हि** । सो एवं **पिटकत्तयपाळिमुग्गण्हन्तो**येव अज्जासि “अयमेकायनमग्गो दस्सनविसुद्धिया निब्बानसच्छिकिरियाया”ति । आचरियुपज्झाया च तस्स विसिट्ठजाणप्पभावसम्पन्नभावं जत्वा “इमस्स बुद्धसासने कित्तिघोसो बुद्धस्स विय पवत्तिस्सती”ति सम्पस्समाना “**बुद्धघोसो**”ति नाममकंसु । तेन वुत्तं “बुद्धघोसोति गरूहि गहितनामधेय्येना”ति ।

सो एवं **पिटकत्तयपाळिमुग्गण्हित्वा मदरस** नगरसमीपट्ठानभूते **मयूरदूतपट्टनम्हि** च **कज्जिपुरा**दीसु च वसन्तो **अन्धकटुकथाय** परिचयं कत्वा ताय असन्तुट्टचित्तो सीहळट्टकथासुपि परिचयं कातुकामो ता च पाळिभासमारोपेत्वा अभिनवीकातुमासीसन्तो सीहळदीपमगमासि । तस्मिञ्च काले सीहळदीपे **महानामो** नाम राजा रज्जं कारेति, सो च राजा **अभयगिरिवासीसु** पसन्नो तेयेव विसेसतो पग्गण्हाति ।

एकच्चे पन आधुनिका विचक्खणा एवं वदन्ति “आचरियबुद्धघोसस्स सीहळदीपागमनेन **सिरिमेधवण्णराज**कालतो (८४६-बु-व) पुरेतरंयेव भवितब्ब”न्ति । इदञ्च नेसं कारणं, तस्स रज्जो नववस्सकाले (८५५-बु-व) बुद्धस्स **दाठाधातुकलिङ्गरट्टो** सीहळदीपमानीता, ततो पट्टाय सीहळराजानो अनुसंवच्छरं महन्तं धातुपूजाउस्सवं करोन्ति । यदि च

आचरियबुद्धघोसो ततो पच्छा सीहळदीपमागच्छेय्य, तम्पि पासादिकं महुस्सवं दिस्वा अत्तनो गन्थेसु पकासेय्य यथा फाहियं नाम चिनभिक्खु महानामराजकाले (९५३-९७५-बु-व) तं दिस्वा अत्तनो अद्धानक्कमकथायं पकासेसि, न पन आचरियस्स गन्थेसु तंपकासना दिस्सति, तेनेतं जायति “आचरियबुद्धघोसो दाठाधातुसम्पत्तकालतो (८५५-बु-व) पुरेतरंयेव सीहळदीपमागन्त्वा अट्टकथायो अकासी”ति । तं पन न दळ्हकारणं होति, तिपिटकपाळिया हि अत्थसंवण्णनाय यं वा तं वा अत्तनो पच्चक्खदिट्ठं पकासेतब्बं न होति, न च अत्थसंवण्णना अद्धानक्कमकथासदिसा । किञ्च भिय्यो, समन्तपासादिकाय विनयट्टकथायं दीपवंसतोपि किञ्चि आनेत्वा पकासितं, दीपवंसे च याव महासेनराजकाला (८१९-८४५-बु-व) पवत्ति पकासिताति सिरिमेघवण्णराजकालतो (८४५-८७३-बु-व) पुब्बे दीपवंसोयेव लिखितो न भवेय्य । यदि च अट्टकथायो ततो पुब्बेयेव कता भवेय्युं, कथं तत्थ दीपवंसो सक्का पकासेतुन्ति ।

आचरियबुद्धघोसो पन सीहळदीपं पत्तकाले (९६५-बु-व) **महाविहारमेव** गन्त्वा तत्थ सीहळमहाथेरानं सन्तिके सीहळट्टकथायो सुणि । वुत्तज्झि समन्तपासादिकायं —

“महाअट्टकथञ्चेव, महापच्चरिमेव च ।
कुरुन्दिज्जाति तिस्सोपि, सीहळट्टकथा इमा ॥

बुद्धमित्तोति नामेन, विस्सुतस्स यसस्सिनो ।
विनयज्जुस्स धीरस्स, सुत्वा थेरस्स सन्तिके”ति [परि० अट्ट० निगमनकथा] ॥

इमिना पन अट्टकथावचनेन महाअट्टकथादीनं तिस्सनंयेव अट्टकथानं सुतभावो दस्सितो । समन्तपासादिकायं पन सङ्खेपअन्धकट्टकथानम्पि विनिच्छयो दस्सितोयेव, कस्मा पन ता आचरियेन सीहळत्थेरानं सन्तिके न सुताति? तासु हि अन्धकट्टकथा ताव अन्धकरट्टिकभावतो, कतपरिचयभावतो च न सुताति पाकटोयेवायमत्थो । सङ्खेपट्टकथा पन महापच्चरिट्टकथाय संखित्तमत्तभावतो न सुताति वेदितब्बा । तथा हि **वजिरबुद्धिटीकायं** गन्थारम्भसंवण्णनायं [विजिर० टी० गन्थारम्भकथावण्णना] चूळपच्चरिट्टकथाअन्धकट्टकथानम्पि आदि-सद्देन सङ्गहितभावो वुत्तो, **सारत्थदीपनी-विमतिविनोदनीटीकासु** [सारत्थ० टी० १.९२ पाचित्तियकण्ड; वि० वि० टी० १.गन्थारम्भकथावण्णना] पन अन्धकसङ्खेपट्टकथानं सङ्गहितभावो वुत्तो, समन्तपासादिकायञ्च चूळपच्चरीति नामं कुहिज्जिपि न दिस्सति, महाट्टकथा महापच्चरी कुरुन्दी अन्धकसङ्खेपट्टकथाति इमानियेव नामानि दिस्सन्ति, बहूसु च ठानेसु “सङ्खेपट्टकथायं पन महापच्चरियञ्च वुत्त”न्तिआदिना [पारा० अट्ट० १.९४] द्विन्नम्पि समानविनिच्छयो दस्सितो । तस्मा वजिरबुद्धियं चूळपच्चरीति वुत्तट्टकथा महापच्चरितो उद्धरित्वा सङ्खेपेन कतट्टकथा भवेय्य, सा च सङ्खेपेन कतत्ता **सङ्खेपट्टकथा** नाम जाता भवेय्य । एवञ्च सति महापच्चरिया सुताय सापि सुतायेव होतीति न सा आचरियेन सुताति वेदितब्बा ।

एवं सीहळट्टकथायो सुणन्तस्सेव आचरियबुद्धघोसस्स तिक्खगम्भीरजवनजाणप्पभावविसेससम्पन्नभावञ्च परमविसुद्धसद्भावबुद्धिवीरियपटिमण्डितसीलाचारज्जवमद्ववादिगुणसमुदय- समुदितभावञ्च सकसमयसमयन्तरगहनज्झोगाहणसमत्थपञ्जावेय्यत्ति- यसमन्नागतभावञ्च अनेकसत्थन्तरोचितसंवण्णनानयसुकोविदभावञ्च अत्वा तंसवनकिच्चपरिनिट्टितकाले **सङ्गपाला**दयो थेरा तं विसुद्धिमग्गादिगन्थानं करणत्थाय विसुं विसुं आयाचिसु । एत्थ च आचरियस्स यथावुत्तगुणेहि सम्पन्नभावो अत्तनो वचनेनेव पाकटो । वुत्तज्झि अत्तनो गन्थनिगमनेसु —

“परमविसुद्धसद्भावबुद्धिवीरियपटिमण्डितेन सीलाचारज्जवमद्ववादिगुणसमुदयसमुदितेन सकसमयसमयन्तरगहनज्झोगाहणसमत्थेन पज्जावेय्यत्तियसमन्नागतोति”तिआदि ।

तत्थ सकसमयसमयन्तरगहनज्झोगाहणसमत्थेनाति पदेन आचरियबुद्धघोसत्थेरो महाविहारवासीनं विसुद्धत्थेरादीनं देसनानयसङ्घाते सकसमये च महासङ्घिकादिमहायानिकपरियोसानानं निकायन्तरभूतानं परेसं पिटकगन्थन्तरवादनयसङ्घाते परसमये च तथा तं कालिकअज्जतित्थियसमणब्राह्मणानं वेदत्तयादिसङ्घाते परसमये च कोविदो, तेसं सकसमयपरसमयानं दुरोगाहदुब्बोधत्थसङ्घाते गहनद्वानेपि च ओगाहितुं समत्थोति दीपेति ।
पज्जावेय्यत्तियसमन्नागतोति पदेन आचरियबुद्धघोसत्थेरो पोराणडुकथायो सङ्घिपितुञ्च पटिसङ्घरितुञ्च समत्थोति दीपेतीति वेदितब्बो ।

आयाचनकारणं

कस्मा पन ते तं आयाचिसूति? वुच्चते, महाविहारवासिनो हि आदितोयेव पट्टाय पिटकत्तयं यथा तीसु सङ्गीतीसु पाळिभासाय सङ्गीतं, यथा च **वट्टगामणिराजकाले** (४५५-४६७-बु-व) पोत्थकेसु आरोपितं, तथा पोराणं पाळिपिटकमेव उगगणहन्ति चेव वाचेन्ति च, न सक्कतारोपितपिटकं । अट्टकथायो च तिवस्ससतमत्ततो पुरे कता । तथा हि अट्टकथासु **वसभराजकालतो** (६०९-६५३-बु-०) पच्छा सीहळिकत्थेरानज्जेव अज्जेसञ्च वत्थु न दिस्सति ठपेत्वा **महासेनराजवत्थुं** [पारा० अट्ट० २.२३६-२३७], याव आचरियबुद्धघोसकालापि च ता एव पोराणडुकथायो अत्थि न अभिनवीकता । तेन तेसं पिटकेसु येभ्य्येन जना परिचयं कातुं असज्जाताभिलासा होन्ति असज्जातुस्साहा । दीपन्तरेसु च अत्तनो पिटकं पत्थरापेतुं न सक्कोन्ति अट्टकथानं दीपभासाय अभिसङ्घत्तता । अभयगिरिवासिनो पन वट्टगामणिराजकालतो पट्टाय सक्कतभासारोपितं धम्मरुचिनिकायादिपिटकम्पि महायानपिटकम्पि नवं नवं परियापुणन्ति चेव वाचेन्ति च, तेन तेसं पिटकेसु येभ्य्येन जना परिचयं कातुं सज्जाताभिलासा होन्ति सज्जातुस्साहा, नवं नवमेव हि सत्ता पियायन्ति । ततोयेव ते दीपन्तरेसुपि अत्तनो वादं पत्थरापेतुं सक्कोन्ति । तस्मा ते महाविहारवासिनो थेरा अत्तनो सीहळडुकथायो पाळिभासाय अभिसङ्घरितुकामा तथा कातुं समत्थं आचरियबुद्धघोसत्थेरस्स जाणप्पभावविसेसं यथावुत्तगुणसम्पन्नभावञ्च जत्वा आयाचिसूति वेदितब्बं ।

विसुद्धिमगगस्स करणं

तेसु ताव विसुद्धिमगं आचरियबुद्धघोसो सङ्घपालत्थेरेन अज्जेसितो महाविहारस्स दक्खिणभागे पधानघरे महानिगमस्सामिनो पासादे [परि० अट्ट० निगमनकथा] वसन्तो अकासि । एत्तावता च “सो पनेस विसुद्धिमगो केन कतो, कदा कतो, कथं कतो, कस्मा कतो”ति इमेसं पज्जानमत्थो वित्थारेन विभावितो होति ।

इदानीं किमत्थं कतोतिआदीनं पज्जानमत्थं पकासयिस्साम । तत्थ **किमत्थं कतोति** एतस्स पन पज्जहस्स अत्थो आचरियेनेव पकासितो । कथं?

“सुदुल्लभं लभित्वान, पब्बज्जं जिनसासने ।
सीलादिसङ्गहं खेमं, उजुं मगं विसुद्धिया ॥

यथाभूतं अजानन्ता, सुद्धिकामापि ये इध ।
विसुद्धिं नाधिगच्छन्ति, वायमन्तापि योगिनो ॥

तेसं पामोज्जकरणं, सुविसुद्धविनिच्छयं ।
महाविहारवासीनं, देसनानयनिस्सितं ॥

विसुद्धिमग्गं भासिस्सं, तं मे सक्कच्च भासतो ।
विसुद्धिकामा सब्बेपि, निसामयथ साधवो”ति [विसुद्धिं १.२] ॥

तस्मा एस विसुद्धिमग्गो विसुद्धिसङ्घातनिब्बानकामानं साधुजनानं सीलसमाधिपञ्चासङ्घातस्स विसुद्धिमग्गस्स याथावतो जाननत्थाय कतोति पधानप्पयोजनवसेन वेदितब्बो । अप्पधानप्पयोजनवसेन पन चतूसु आगमट्ठकथासु गन्थसल्लहुकभावत्थायपि कतोति वेदितब्बो । तथा हि वुत्तं आगमट्ठकथासु —

“मज्झे विसुद्धिमग्गो, एस चतुन्नम्पि आगमानज्झि ।
उत्त्वा पकासयिस्सति, तत्थ यथाभासितमत्थं ।
इच्चेव मे कतो”ति [दी० नि० अट्ठ० १.गन्थारम्भकथा] ॥

तन्निस्सयो

किं निस्साय कतोति एतस्सपि पज्जहस्स अत्थो आचरियेनेव पकासितो । वुत्तज्झि एत्थ गन्थारम्भे —

“महाविहारवासीनं, देसनानयनिस्सितं”न्ति [विसुद्धिं १.२] ।

तथा निगमनेपि —

“तेसं सीलादिभेदानं, अत्थानं यो विनिच्छयो ।
पज्चन्नम्पि निकायानं, वुत्तो अट्ठकथानये ॥

समाहरित्वा तं सब्बं, येभुय्येन सनिच्छयो ।
सब्बसङ्करदोसेहि, मुत्तो यस्मा पकासितो”ति [दी० नि० अट्ठ० १.गन्थारम्भकथा] ॥

इमिना पन वचनेन अयमत्थो पाकटो होति — “विसुद्धिमग्गं कुरुमानो आचरियो महाविहारवासीनं देसनानयसङ्घाता पज्चन्नम्पि निकायानं पोराणट्ठकथायो निस्साय तासु वुत्तं गहेतब्बं सब्बं विनिच्छयं समाहरित्वा अकासी”ति । तस्मा या या एत्थ पदवण्णना वा विनिच्छयो वा साधकवत्थु वा दस्सीयति, तं सब्बं तस्स तस्स निद्धारितपाळिपदस्सनिकायसंवण्णनाभूताय पोराणसीहळट्ठकथातो आनेत्त्वा भासापरिवत्तनवसेनेव दस्सितन्ति वेदितब्बं । अयम्पि हि विसुद्धिमग्गो न केवलं अत्तनो जाणप्पभावेन कतो, विसुं पकरणभावेन च, अथ खो चतुन्नम्पि आगमट्ठकथानं अवयवभावेनेव कतो । वुत्तज्झि तासं निगमने —

“एकूनसद्धिमत्तो, विसुद्धिमग्गोपि भाणवारेहि ।
अत्थप्पकासनत्थाय, आगमानं कतो यस्मा ॥

तस्मा तेन सहायं, अट्ठकथा भाणवारगणनाय ।
सुपरिमितपरिच्छिन्नं, चत्तालीससतं होती”तिआदि [दी० नि० अट्ठ० ३.निगमनकथा] ॥

या पन विसुद्धिमग्गे मग्गामग्गजाणदस्सनविसुद्धिनिद्देसे “अयं ताव विसुद्धिकथायं नयो । अरियवंसकथायं पना”तिआदिना [विसुद्धि० २.७१७] द्वे कथा वुत्ता, तापि महाविहारवासीनं देसनानये अन्तोगधा इमस्स विसुद्धिमग्गस्स निस्सयायेवाति वेदितब्बाति ।

तक्करणप्पकारो

केन पकारेन कतोति एत्थ अनन्तरपज्जे वुत्तप्पकारेनेव कतो । तथा हि आचरियो संयुत्तनिकायतो

“सीले पतिट्ठाय नरो सपज्जो, चित्तं पज्जज्ज भावयं ।
आतापी निपको भिक्खु, सो इमं विजटये जट”न्ति [सं० नि० १.२३] —

इमं गाथं पठमं दस्सेत्वा तत्थ पधानवसेन वुत्ता सीलसमाधिपज्जायो विसुं विसुं वित्थारतो विभजित्वा अकासि । एवं कुरुमानो च पज्जहिपि निकायेहि सीलसमाधिपज्जापटिसंयुत्तानि सुत्तपदानि उद्धरित्वा तेसं अत्थज्ज सीहळट्ठकथाहि भासापरिवत्तनवसेन दस्सेत्वा तासु वुत्तानि सीहळिकवत्थूनि च विनिच्छये च पकासेसि । विसेसतो पन तस्मिं काले पाकटा सकसमयविरुद्धा समयन्तरा च बहूसु ठानेसु दस्सेत्वा सहेतुकं पटिक्खत्ता । कथं?

तत्थ हि चरियावण्णनायं “तत्र पुरिमा ताव तिस्सो चरिया पुब्बाचिण्णनिदाना धातुदोसनिदाना चाति एकच्चे वदन्ति । पुब्बे किर इट्ठप्पयोगसुभकम्मबहुलो रागचरितो होति, सग्गा वा चवित्वा इधूपपन्नो । पुब्बे छेदनवधबन्धनवेरकम्मबहुलो दोसचरितो होति, निरयनागयोनीहि वा चवित्वा इधूपपन्नो । पुब्बे मज्जपानबहुलो सुतपरिपुच्छाविहीनो च मोहचरितो होति, तिरच्छानयोनिया वा चवित्वा इधूपपन्नोति एवं पुब्बाचिण्णनिदानाति वदन्ति । द्विन्नं पन धातूनं उस्सन्नत्ता पुग्गलो मोहचरितो होति पथवीधातुया च आपोधातुया च । इतरासं द्विन्नं उस्सन्नत्ता दोसचरितो । सब्बासं समत्ता पन रागचरितोति । दोसेसु च सेम्हाधिको रागचरितो होति । वाताधिको मोहचरितो । सेम्हाधिको वा मोहचरितो । वाताधिको रागचरितोति एवं धातुदोसनिदानाति वदन्ती”ति एकच्चेवादां दस्सेत्वा सो “तत्थ यस्मा पुब्बे इट्ठप्पयोगसुभकम्मबहुलापि सग्गा चवित्वा इधूपपन्नापि च न सब्बे रागचरितानेव होन्ति, न इतरे वा दोसमोहचरिता । एवं धातूनज्ज यथावुत्तेनेव नयेन उस्सदनियमो नाम नत्थि । दोसनियमे च रागमोहद्वयमेव वुत्तं, तम्पि च पुब्बापरविरुद्धमेव । तस्मा सब्बमेतं अपरिच्छिन्नवचन”न्ति [विसुद्धि० १.४४] पटिक्खत्तो । तं परमत्थमज्जूसाय नाम विसुद्धिमग्गमहाटीकायं “एकच्चेति उपतिस्सत्थेरं सन्धायाह, तेन हि विमुत्तिमग्गे तथा वुत्त”न्तिआदिना वण्णितं [विसुद्धि० टी० १.४४] ।

विमुत्तिमग्गपकरणं

को सो विमुत्तिमग्गो नाम? विसुद्धिमग्गो विय सीलसमाधिपज्जानं विसुं विसुं विभजित्वा दीपको एको

पटिपत्तिगन्थो । तत्थ हि —

“सीलं समाधि पज्जा च, विमुत्ति च अनुत्तरा ।

अनुबुद्धा इमे धम्मा, गोतमेन यसस्सिना”ति [दी० नि० २.१८६; अ० नि० ४.१] —

इमं गाथं पठमं दस्सेत्वा तदत्थवण्णनावसेन सीलसमाधिपज्जाविमुत्तियो विसुं विसुं विभजित्वा दीपिता । सो पन गन्थो इदानीं चिनरट्टेयेव दिट्ठो, चिनभासाय च परिवत्तितो (१०४८-बु-व) सङ्गपालेन नाम भिक्खुना । केन पन सो कुतो च तत्थ आनीतोति न पाकटमेतं । तस्स पन सङ्गपालस्स आचरियो गुणभद्रो नाम महायानिको भिक्खु मज्झिमइन्दियदेसिको, सो इन्दियरट्ठतो चिनरट्ठं गच्छन्तो पठमं सीहळदीपं गन्त्वा ततो (१७८-बु-व) चिनरट्ठं गतो । तदा सो तेन आनीतो भवेय्य [विमुत्तिमग्ग, विसुद्धिमग्ग] ।

तस्मिं विमुत्तिमग्गे पुब्बाचिण्णनिदानदस्सनं धातुनिदानदस्सनञ्च यथेव विसुद्धिमग्गे एकच्चेवादो, तथेवागतं । दोसनिदानदस्सने पन “सेम्हाधिको रागचरितो, पित्ताधिको दोसचरितो, वाताधिको मोहचरितो । सेम्हाधिको वा मोहचरितो, वाताधिको रागचरितो”ति तिण्णम्पि रागदोसमोहानं दोसनियमो वुत्तो । आचरियबुद्धघोसेन दिट्ठविमुत्तिमग्गपोत्थके पन “पित्ताधिको दोसचरितो”ति पाठो ऊनो भवेय्य ।

अज्जानिपि बहूनि विसुद्धिमग्गे पटिक्खित्तानि तत्थ विमुत्तिमग्गे गहेतब्बभावेन दिस्सन्ति । कथं?

सीलनिद्देसे (१, ८-पिट्ठे) “अज्जे पन सिरट्ठो सीलत्थो, सीतलत्थो सीलत्थोति एवमादिनापि नयेनेत्थ अत्थं वण्णयन्ती”ति पटिक्खित्तो अत्थोपि तत्थ गहेतब्बभावेन दिस्सति ।

तथा **धुतङ्गनिद्देसे** (१, ७८-पिट्ठे) “येसम्पि कुसलत्तिकविनिमुत्तं धुतङ्गं, तेसं अत्थतो धुतङ्गमेव नत्थि, असन्तं कस्स धुननतो धुतङ्गं नाम भविस्सति, धुतगुणे समादाय वत्ततीति वचनविरोधोपि च नेसं आपज्जति, तस्मा तं न गहेतब्ब”न्ति पटिक्खित्तं पज्जत्तिधुतङ्गम्पि तत्थ दिस्सति । महाटीकायं (१-१०४) पन “येसन्ति अभयगिरिवासिके सन्धायाह, ते हि धुतङ्गं नाम पज्जत्तीति वदन्ती”ति वण्णितं ।

तथा **पथवीकसिणनिद्देसे** (१, १४४) “पटिपदाविसुद्धि नाम ससम्भारिको उपचारो, उपेक्खानुबूहना नाम अप्पना, सम्पहंसना नाम पच्चवेक्खणाति एवमेके वण्णयन्ती”ति आदिना पटिक्खित्तएकेवादोपि तत्थ दिस्सति । महाटीकायं (१, १७२) पन “एकेति अभयगिरिवासिनो”ति वण्णितं ।

तथा **खन्धनिद्देसे** (२, ८०-पिट्ठे) “बलरूपं सम्भवरूपं जातिरूपं रोगरूपं एकच्चानं मतेन मिद्धरूपं”न्ति एवं अज्जानिपि रूपानि आहरित्वा पोराणट्ठकथायं तेसं पटिक्खित्तभावो पकासितो । महाटीकायं “एकच्चानन्ति अभयगिरिवासीन”न्ति वण्णितं । तेसु जातिरूपं मिद्धरूपञ्च विमुत्तिमग्गे दस्सितं । न केवलं दस्सनमत्तमेव, अथ खो मिद्धरूपस्स अत्थिभावोपि “मिद्धं नाम तिविधं आहारजं उतुजं चित्तजज्जाति । तेसु चित्तजमेव नीवरणं होति, सेसा पन द्वे अरहतोपि भवेय्यु”न्ति आदिना साधितो ।

एत्तावता च विमुत्तिमग्गे विसुद्धिमग्गेन असमानत्थानं वुत्तभावो च अभयगिरिवासीहि तस्स गन्थस्स पटिग्गहितभावो च सक्का जातुं । अज्जानिपि पन ईदिसानि असमानवचनानि बहूनि तत्थ संविज्जन्तियेव, तानि पन सब्बानि न सक्का इध

दस्सेतुं।

येभ्य्येन पनस्स करणप्पकारो विसुद्धिमग्गस्स विय होति। या या हि पाळि अभिधम्मविभङ्गतो वा पटिसम्भिदामग्गतो वा अज्जसुत्तन्तेहि वा आनेत्वा साधकभावेन विसुद्धिमग्गे दस्सियति, तत्थपि सा सा पाळि येभ्य्येन दिस्सतेव। तासु कज्जिमत्तं उद्धरित्वा अनुमिननत्थाय दस्सयिस्साम।

या विसुद्धिमग्गे (१, ४७-पिट्ठे) “पञ्च सीलानि पाणातिपातस्स पहानं सील”न्तिआदिका पटिसम्भिदामग्गपाळि दस्सिता, सा विमुत्तिमग्गेपि दिस्सतेव।

यज्ज विसुद्धिमग्गे (१, १३७-पिट्ठे) “समाधि कामच्छन्दस्स पटिपक्खो...पे०... विचारो विचिकिच्छाया”ति वचनं **पेटके** वुत्तन्ति दस्सितं, तज्ज तत्थपि तथेव दस्सेत्वा “**तिपेटके** वुत्त”न्ति निद्विडुं। **तिपेटके**ति नामज्ज पेटकोपदेसमेव सन्धाय वुत्तं भवेय्य। तत्थ हि विविच्चेव कामेहीति पाठसंवण्णनायं “अलोभस्स पारिपूरिया कामेहि विवेको सम्पज्जति, अदोसस्स। अमोहस्स पारिपूरिया अकुसलेहि धम्मोहि विवेको सम्पज्जती”ति पाठस्स तिपेटके वुत्तभावो दस्सितो। सो च पाठो पेटकोपदेसे (२६२-पिट्ठे) “तत्थ अलोभस्स पारिपूरिया विवित्तो होति कामेही”तिआदिना दिस्सति।

यथा च विसुद्धिमग्गे (१, २५८-पिट्ठे) “अयम्पि खो भिक्खवे आनापानस्सतिसमाधि भावितो”तिआदिका पाळि महावग्गसंयुत्तकतो आनेत्वा दस्सिता, तथेव तत्थपि।

यथा च विसुद्धिमग्गे (१, २७२-पिट्ठे) “अस्सासादिमज्झपरियोसानं सतिया अनुगच्छतो”तिआदि पाळि च (१, २७३-पिट्ठे) ककचूपमपाळि च पटिसम्भिदामग्गतो आनेत्वा दस्सिता, तथेव तत्थपि।

यथा च विसुद्धिमग्गे (२, ६९-पिट्ठे) “कतमा चिन्तामया पज्जा”तिआदिका च पाळि “तत्थ कतमं आयकोसल्ल”न्तिआदिका च पाळि (२, ७१-पिट्ठे) “दुक्खे जाणं अत्थपटिसम्भिदा”तिआदिका च पाळि अभिधम्मविभङ्गतो आनेत्वा दस्सिता, तथेव तत्थपि। सब्बापि च तत्थ वुत्ता एकविधदुविधादिपज्जापभेदकथा विसुद्धिमग्गे वुत्तकथाय येभ्य्येन समानायेव।

“येन चक्खुपसादेन, रूपानि मनुपस्सति।

परित्तं सुखुमं एतं, ऊकासिरसमूपम”न्ति [विसुद्धि० २.४३६; ध० स० अट्ठ० ५९६] —

अयम्पि गाथा विमुत्तिमग्गेपि आयस्मता सारिपुत्तत्थेरेन भासितभावेनेव दस्सिता। **ऊकासिरसमूपमन्ति** पदं पन **ऊकासमूपमन्ति** तत्थ दिस्सति, तज्ज परम्परलेखकानं पमादलेखमत्तमेव सिया।

चतूसु सच्चेसु विसुद्धिमग्गे विय वचनत्थतो लक्खणतो अनूनाधिकतो कमतो अन्तो गधानं पभेदतो उपमातो च विनिच्छयो दस्सितो, सो च येभ्य्येन विसुद्धिमग्गेन [विसुद्धि० २.५३०] समानोयेव।

यथा च विसुद्धिमग्गे (२, २४२-२४५) सम्मसनजाणकथायं पञ्चन्नं खन्धानं अतीतादिकादसविधेन च अनिच्चादिलक्खणत्तयेन च विसुं विसुं सम्मसननयो दस्सितो, तथेव तत्थपि। चक्खादिजरामरणपरियोसानेसु पन धम्मोसु धम्मविचारपरियोसानानं सट्ठिया एव धम्मानं अनिच्चादिलक्खणत्तयेन सम्मसननयो तत्थ दस्सितो।

विसुद्धिमग्गे पन दिट्ठिविसुद्धिनिद्वेसे (२, २३०-२३२-पिट्ठेसु) वुत्ता “यमकं नामरूपञ्च...पे०... उभो भिज्जन्ति पच्चया”ति गाथा च, “न चक्खुतो जायरे”तिआदिका छ गाथायो च, “न सकेन बलेन जायरे”तिआदिका छ गाथायो च विमुत्तिमग्गे भङ्गानुपस्सनाजाणकथायं दस्सिता । तासु अप्पमत्तकोयेव पाठभेदो दस्सति ।

विसुद्धिमग्गे (२, २६१-२-पिट्ठेसु) अरूपसत्तकेसु अरियवंसकथानयेन वुत्तो कलापतो च यमकतो च सम्मसननयो विमुत्तिमग्गे एत्थेव भङ्गानुपस्सनाजाणकथायं दस्सितो ।

विमुत्तिमग्गे बुद्धानुस्सतिकथायं लोकविदूति पदस्स अत्थवण्णनायं सत्तलोकसङ्खारलोकवसेन द्वेयेव लोका दस्सिता, न पन ओकासलोको यथा विसुद्धिमग्गे (१, १९९-२००-पिट्ठेसु) ।

एत्तावता च विमुत्तिमग्गे नाम गन्थो कीदिसोति सक्का अनुमिनिंतुं । सो पन यथा न महाविहारवासीनं गन्थो होति, एवं महायानिकानम्पि न होतियेव थेरवादपिटकमेव निस्साय कतभावतो । यस्मा पन तत्थ न किञ्चिपि सीहळदीपिकं नामं वा थेरवादो वा दस्सति, तस्मा सो सीहळदीपे कतगन्थोपि न होति । इन्दियरट्टिकं पन नामञ्च वोहारो च तत्थ बहूसु ठानेसु दस्सति, तस्मा इन्दियरट्टे कतगन्थोव भवेय्य । यस्मा चस्स पेटकोपदेसं निस्सितभावो बहूसु ठानेसु दस्सति, विसेसतो पन मिद्धरूपस्स अत्थिभावो च, अरहतोपि तस्स अत्थिभावो च तमेव निस्साय दस्सीयति, पटिसम्भिमग्गगण्ठपदे च पेटकेति पदस्स [पटि० म० अट्ठ० १.१.३६] अत्थवण्णनायं “सुत्तन्तपिटकत्थाय अट्ठकथा पेटकं महिसासकानं गन्थो”ति वण्णितो । तस्मा एसो विमुत्तिमग्गे महिसासकनिकायिकेन कतो भवेय्याति अम्हाकं मति ।

निस्सयट्ठकथाविभावना

विसुद्धिमग्गे पन न केवलं पुब्बे वुत्तप्पकारेनेव कतो, अथ खो वुच्चमानप्पकारेनापि । तथा हि आचरियबुद्धघोसत्थेरो पोराणट्ठकथाहि समाहरित्वा भासापरिवत्तनवसेन दस्सेन्तोपि या या अत्थवण्णना वा विनिच्छयो वा संसयितब्बो होति, तत्थ तत्थ विनयट्ठकथायं वुत्तन्ति वा (१, २६३), विनयट्ठकथासु वुत्तं, मज्झिमट्ठकथासु पनाति वा (१, ७०), अङ्गुत्तरभाणकाति वा (१, ७२), अट्ठकथाचरियानं मतानुसारेन विनिच्छयोति वा (१, ९९), वुत्तम्पि चेतं अट्ठकथासूति वा (१, ११८), तं अट्ठकथासु पटिक्खित्तन्ति वा (१, १३४), दीघभाणकसंयुत्तभाणकानं मतन्ति वा, मज्झिमभाणका इच्छन्तीति वा (१, २६७), अट्ठकथासु विनिच्छयोति वा, एवं ताव दीघभाणका, मज्झिमभाणका पनाहूति वा (१, २७७), अङ्गुत्तरट्ठकथायं पन...पे०... अयं कमो वुत्तो, सो पाळिया न समेतीति वा (१, ३०९), एवं ताव मज्झिमभाणका, संयुत्तभाणका पनाति वा (२, ६२), संयुत्तट्ठकथायं वुत्तन्ति वा (२, ६३), अट्ठकथायं पनाति वा (२, ८०) एवं तंतं अत्थवण्णनाविनिच्छयानं निस्सयम्पि विभावेत्वा पच्छिमजनानं उप्पज्जमानसंसयं विनोदेन्तोयेव ते दस्सेसि ।

तेनिमस्स विसुद्धिमग्गस्स करणकाले सब्बापि सीहळट्ठकथायो आचरियस्स सन्तिके सन्तीति च, पुब्बेयेव ता आचरियेन सीहळत्थेरानं सन्तिके सुताति च, ताहि गहेतब्बं सब्बं गहेत्वा अयं विसुद्धिमग्गे आचरियेन लिखितोति च अयमत्थो अतिविय पाकटो होति । तस्मा यं महावंसे —

“सङ्गो गाथाद्वयं तस्सा दासि सामत्थियं तवा”तिआदिना “गाथाद्वयमेव ओलोकेत्वा किञ्चिपि अज्जं पोत्थकं अनोलोकेत्वा आचरियबुद्धघोसो विसुद्धिमग्गं अकासी”ति अधिप्पायेन अभित्थुतिवचनं वुत्तं, तं अभित्थुतिमत्तमेवाति वेदितब्बं ।

पोराणवचनदस्सनं

न केवलं आचरियो अट्टकथायोयेव निस्सयभावेन दस्सेसि, अथ खो “पोराणा पनाहू”तिआदिना पोराणानं वचनम्पि दस्सेसियेव । तदेत्थ द्वावीसतिया ठानेसु दिट्ठं [विसुद्धिं १.१५, १३७, १४२, २१७, २५२, ३०३; २.५८१, ६७५-६७६, ६८९, ७०६, ७३६, ७४५, ७४६, ७४९, ७५५, ७७८, ८३९] । के पनेते पोराणा नाम? याव चतुत्थसङ्गीतिकाला सङ्गीतिकारेसु परियापन्ना वा तादिसा वा महाथेराति वेदितब्बा । तथा हि पटिसम्भिदामग्गे (२९२-३-पिट्ठेसु) ।

“ओभासे चेव जाणे च, पीतिया च विकम्पति...पे०...
धम्मुद्धच्चकुसलो होति, न च विक्खेपं गच्छती”ति —

एवमागता गाथायो इध (२७३-४-पिट्ठेसु) पोराणानं वचनभावेन दस्सिता । यदि चिमा गाथायो सङ्गीतिकारेहि पक्खित्ता भवेय्युं यथा परिवारपाळियं (३-पिट्ठे) आगता आचरियपरम्परादीपिका गाथायो, ता हि समन्तपासादिकायं (१, ४६-पिट्ठे) पोराणवचनभावेन दस्सिता, एवं सति तेयेव सङ्गीतिकारा पोराणाति वेदितब्बा । अथ पटिसम्भिदामग्गदेसकेनेव भासिता भवेय्युं, ते विय गरुकरणीया पच्चयिका सद्भावितब्बका महाथेरा पोराणाति वेदितब्बा । समन्तपासादिकासुमङ्गलविलासिनीआदीसु “पोराणा पन एवं वण्णयन्ती”तिआदिना वुत्तडानेसुपि तादिसाव आचरिया पोराणाति वुत्ता ।

विनयट्टकथाकरणं

आचरियो पन इमं विसुद्धिमग्गपकरणं यथावुत्तप्पकारेन कत्वा अज्जापि तिपिटकट्टकथायो अनुक्कमेन अकासि । कथं? समन्तपासादिकं नाम विनयट्टकथं बुद्धसिरित्थेरेन अज्जेसितो महाविहारस्स दक्खिणभागे पधानघरपरिवेणे महानिगमस्सामिनो पासादे वसन्तो अकासि । सा पनेसा सिरिपालोति नामन्तरस्स महानामरज्जो वीसतिमवस्से (९७३-बु-व) आरब्धा एकवीसतिमवस्से (९७४-बु-व) निट्ठानप्पत्ता अहोसि । तज्ज पन करोन्तो महामहिन्दत्थेरेनाभतं सीहळभासाय सङ्घतं महाअट्टकथं तस्सा सरीरं कत्वा महापच्चरीकुरुन्दीसङ्घेपअन्धकट्टकथाहि च गहेतब्बं गहेत्वा सीहळदीपे याव वसभराजकाला पाकटानं पोराण विनयधरमहाथेरानं विनिच्छयभूतं थेरवादम्पि पक्खिपित्वा अकासि । वुत्तज्जेतं समन्तपासादिकायं —

“संवण्णनं तज्ज समारभन्तो, तस्सा महाअट्टकथं सरीरं ।
कत्वा महापच्चरियं तथेव, कुरुन्दिनामादिसु विस्सुतासु ॥

विनिच्छयो अट्टकथासु वुत्तो, यो युत्तमत्थं अपरिच्चजन्तो ।
ततोपि अन्तो गधथेरवादं, संवण्णनं सम्म समारभिस्स”न्ति च ॥

“महामेघवनुय्याने, भूमिभागे पतिट्ठितो ।
महाविहारो यो सत्थु, महाबोधिविभूसितो ॥

यं तस्स दक्खिणे भागे, पधानघरमुत्तमं ।

सुचिचारित्तसीलेन, भिक्खुसङ्गेन सेवितं ॥

उळारकुलसम्भूतो, सङ्घुपट्टायको सदा ।
अनाकुलाय सद्भाय, पसन्नो रतनत्तये ॥

महानिगमसामीति, विस्सुतो तत्थ कारयि ।
चारुपाकारसञ्चितं, यं पासादं मनोरमं ॥

सन्दच्छायतरूपेतं, सम्पन्नसलिलासयं ।
वसता तत्र पासादे, महानिगमसामिनो ॥

सुचिसीलसमाचारं, थेरं बुद्धसिरिक्खयं ।
या उद्दिसित्वा आरद्धा, इद्धा विनयवण्णना ॥

पालयन्तस्स सकलं, लङ्कादीपं निरब्बुदं ।
रज्जो सिरिनिवासस्स [सिरिया निवासट्टोन्नभूतस्स सिरिपालनामकस्स रज्जो (विमति, अन्तिमविट्ठे)],
सिरिपालयसस्सिनो ॥

समवीसतिमे वस्से, जयसंवच्छरे अयं ।
आरद्धा एकवीसम्हि, सम्पत्ते परिनिट्ठिता ॥

उपद्ववाकुले लोके, निरुपद्ववतो अयं ।
एकसंवच्छरेनेव, यथा निट्ठं उपागता'ति [परि० अट्ठ० निगमनकथा] च ॥

अयञ्च समन्तपासादिका विनयट्ठकथा अधुना मुद्दितछट्ठसङ्गीतिपोत्थकवसेन सहस्सतो उपरि
अट्ठपण्णासाधिकतिसतमत्तपिट्ठपरिमाणो (१३५८) होति, तस्सा च एकसंवच्छरेन निट्ठापितत्तं उपनिधाय
चतुर्वीसाधिकसत्तसतमत्तपिट्ठपरिमाणो (७२४) विसुद्धिमग्गोपि अन्तमसो छप्पञ्चमासेहि निट्ठापितो भवेय्याति सक्का
जातुं । तस्मा यं बुद्धघोसुप्पत्तियं महावंसवचनं निस्साय “विसुद्धिमग्गो आचरियबुद्धघोसेन एकरत्तेनेव तिक्खत्तुं लिखित्वा
निट्ठापितो'ति अभित्थुतिवचनं वुत्तं, तं तक्कारकस्स अभित्थुतिमत्तमेवाति वेदितब्बं ।

ननु च इमिस्सं अट्ठकथायं “सुमङ्गलविलासिनिय”न्तिआदिना विसेसनामवसेन आगमट्ठकथानं अतिदेसो दिस्सति
[पारा० अट्ठ० १.१५], कथमिमिस्सा ताहि पठमतरं कतभावो वेदितब्बोति? आचरियस्स अट्ठकथासु अज्जमज्जातिदेसतो,
विनयपिटकस्स गरुकातब्बतरभावतो, महाविहारवासीहि विसेसेन गरुकतभावतो, सङ्गीतिक्कमानुरूपभावतो, इधेव
परिपुण्णनिदानकथापकासनतो, निगमने च पठमं सीहळट्ठकथायो सुत्वा करणप्पकासनतो ठपेत्वा विसुद्धिमग्गं अयमेव
पठमं कताति वेदितब्बा । विसुद्धिमग्गे पन विनयट्ठकथायन्ति वा विनयट्ठकथासूति वा मज्झिमट्ठकथासूति वा एवं
सामज्जनामवसेनेव अतिदेसो दिस्सति, न समन्तपासादिकादिविसेसनामवसेन । तस्मास्स सब्बपठमं कतभावो पाकटोयेव ।
आगमट्ठकथानं इधातिदेसो [पारा० अट्ठ० १.१५] इमिस्सापि तत्थाति [दी० नि० अट्ठ० १.८] एवं अज्जमज्जातिदेसो पन
आचरियस्स मनसा सुववत्थितवसेन वा सक्का भवितुं, अपुब्बाचरिमपरिनिट्ठापनेन वा । कथं? आचरियेन हि विसुद्धिमग्गं

सब्बसो निट्ठापेत्वा समन्तपासादिकादिं एकेकमट्ठकथं करोन्तेनेव यत्थ यत्थ अत्थवण्णना वित्थारतो अज्जट्ठकथासु पकासेतब्बा होति, तत्थ तत्थ “इमस्मिं नाम ठाने कथेस्सामी”ति मनसा सुववत्थितं ववत्थपेत्वा तज्ज अतिदिसित्वा यथाववत्थितठानप्पत्तकाले तं वित्थारतो कथेन्तेन ता कता वा भवेय्युं । एकेकिस्साय वा निट्ठानासन्नप्पत्तकाले तं ठपेत्वा अज्जज्ज अज्जज्ज तथा कत्वा सब्बापि अपुब्बाचरिमं परिनिट्ठापिता भवेय्युन्ति एवं द्विन्नं पकारानमज्जतरवसेन आचरियस्साट्ठकथासु अज्जमज्जातिदेसो होतीति वेदितब्बन्ति ।

आगमट्ठकथाकरणं

सुमङ्गलविलासिनिं नाम दीघनिकायट्ठकथं पन आचरियो सुमङ्गलपरिवेणवासिना दाठानागत्येरेन आयाचितो अकासि । वुत्तं हेतमेतिस्सा निगमने —

“आयाचितो सुमङ्गल-परिवेणनिवासिना थिरगुणेन ।

दाठानाग सङ्ग, त्थेरेन थेरवंसन्वयेन ॥

दीघागमस्स दसबल-गुणगणपरिदीपनस्स अट्ठकथं ।

यं आरभिं सुमङ्गल-विलासिनिं नाम नामेन ॥

सा हि महाअट्ठकथाय, सारमादाय निट्ठिता एसा”ति [दी० नि० अट्ठ० ३. निगमनकथा] ।

पपञ्चसूदनिं नाम मज्झिमनिकायट्ठकथं भदन्तबुद्धमित्तत्थेरेन पुब्बे मयूरदूतपट्टने अत्तना सद्धिं वसन्तेन आयाचितो अकासि । वुत्तं हेतमेतिस्सा निगमने —

“आयाचितो सुमतिना, थेरेन भदन्तबुद्धमित्तेन ।

पुब्बे मयूरदूतपट्टनमिहि सद्धिं वसन्तेन ॥

परवादविधंसनस्स, मज्झिमनिकायसेट्ठस्स ।

यमहं पपञ्चसूदनि-मट्ठकथं कातुमारभिं ॥

सा हि महाअट्ठकथाय, सारमादाय निट्ठिता एसा”ति [म० नि० अट्ठ० ३. निगमनकथा] ।

सारत्थप्पकासिनिं नाम संयुत्तनिकायट्ठकथं भदन्तजोतिपालत्थेरेन आयाचितो अकासि । वुत्तं हेतमेतिस्सा निगमने

“एतिस्सा करणत्थं, थेरेन भदन्तजोतिपालेन ।

सुचिसीलेन सुभासितस्स पकासयन्तजाणेन ॥

सासनविभूतिकामेन, याचमानेन मं सुभगुणेन ।

यं समधिगतं पुज्जं, तेनापि जनो सुखी भवतू”ति [सं० नि० अट्ठ० ३.५.निगमनकथा] ॥

मनोरथपूरणिं नाम अङ्गुत्तरनिकायट्ठकथं भदन्तजोतिपालत्थेरेन दक्खिणइन्दियरट्ठे **कञ्चिपुरादीसु** च सीहळदीपे महाविहारम्हि च अत्तना सद्धिं वसन्तेन आयाचितो, तथा **जीवकेनापि** उपासकेन पिटकत्तयपारगुभूतेन वाताहतेपि अनिज्जमानसभावे दुमे विय अनिज्जमानसद्धम्मे ठितेन सुमतिना परिसुद्धाजीवेनाभियाचितो अकासि । वुत्तं हेतमेतिस्सा निगमने —

“आयाचितो सुमतिना, थरेन भदन्तजोतिपालेन ।

कञ्चिपुरादीसु मया, पुब्बे सद्धिं वसन्तेन ॥

वरतम्बपण्णिदीपे, महाविहारम्हि वसनकालेपि ।

वाताहते विय दुमे, अनिज्जमानम्हि सद्धम्मे ॥

पारं पिटकत्तयसा, गरस्स गन्त्वा ठितेन सुमतिना ।

परिसुद्धाजीवेना, भियाचितो **जीवकेनापि** ॥

धम्मकथानयनिपुणेहि, धम्मकथिकेहि अपरिमाणेहि ।

परिकीळितस्स पटिप, ज्जितस्स सकसमयचित्रस्स ॥

अट्ठकथं अङ्गुत्तर, महानिकायस्स कातुमारद्धो ।

यमहं चिरकालट्ठिति-मिच्छन्तो सासनवरस्स ॥

सा हि महाअट्ठकथाय, सारमादाय निट्ठिता एसा ।

चतुन्नवुतिपरिमाणाय, पाळिया भाणवारेहि ॥

सब्बागमसंवण्णन, मनोरथो पूरितो च मे यस्मा ।

एताय **मनोरथ पूरणी**ति नामं ततो अस्सा^१ति [अ० नि० अट्ठ० ३.११.निगमनकथा] ॥

इमा च पन चतस्सो आगमट्ठकथायो कुरुमानो आचरियबुद्धघोसो महामहिन्दत्थेरेनाभतं मूलट्ठकथासङ्घातं महाअट्ठकथंयेव भासापरिवत्तनवसेन चेव पुनप्पुनागतवित्थारकथामगस्स संखिपनवसेन च अकासि । वुत्तज्हेतं गन्थारम्भे

“सीहळदीपं पन आभ, ताथ वसिना महामहिन्देन ।

ठपिता सीहळभासाय, दीपवासीनमत्थाय ॥

अपनेत्वान ततोहं, सीहळभासं मनोरमं भासं ।

तन्तिनयानुच्छविकं, आरोपेन्तो विगतदोसं...पे०...

हित्वा पुनप्पुनागत-मत्थं अत्थं पकासयिस्सामी^२ति ॥

तथा निगमनेपि —

“सा हि महाअट्ठकथाय, सारमादाय निद्धिता एसा”ति [दी० नि० अट्ठ० ३.निगमनकथा] च ।

“मूलट्ठकथासारं, आदाय मया इमं करोन्तेना”ति [दी० नि० अट्ठ० ३.निगमनकथा] च ॥

इमासं सरीरभूतपाठेसु च समन्तपासादिकायं विय “महापच्चरियं, कुरुन्दिय”न्ति आदिना विनिच्छयसंवण्णनाभेदप्पकासनं न दिस्सति, तथा अभिधम्मट्ठकथासुपि । तेनेतं जायति “सुत्तन्ताभिधम्मेसु महाअट्ठकथातो अज्जा महापच्चरिआदिनामिका पोराणिका सीहळट्ठकथायो चेव अन्धकट्ठकथा च नत्थी”ति । याव वसभराजकाला (६०९-६५३) पन पाकटानं सीहळिकत्थेरानं विनिच्छयो च वादा च वत्थूनि च एतासुपि दिस्सन्तियेवाति ।

अभिधम्मट्ठकथाकरणं

अट्ठसालिनिं पन सम्मोहविनोदनिज्ज धातुकथादिपञ्चपकरणस्स अट्ठकथज्जाति तिससो अभिधम्मट्ठकथायो अत्तना सदिसनामेन सोतत्थकीगन्थकारकेन बुद्धघोसभिक्षुना आयाचितो अकासि । वुत्तज्जेतं तासु —

“विसुद्धाचारसीलेन, निपुणामलबुद्धिना ।

भिक्षुना बुद्धघोसेन, सक्कच्चं अभियाचितो”ति [ध० स० अट्ठ० गन्थारम्भकथा] च ॥

“बुद्धघोसोति गरूहि गहितनामधेय्येन थेरेन कता

अयं अट्ठसालिनी नाम धम्मसङ्गहट्ठकथा”ति [ध० स० अट्ठ० निगमनकथा] च ॥

“अत्थप्पकासनत्थं, तस्साहं याचितो ठितगुणेन ।

यतिना अदन्धगतिना, सुबुद्धिना बुद्धघोसेन ॥

यं आरंभि रचयितुं, अट्ठकथं सुनिपुणेसु अत्थेसु ।

सम्मोहविनोदनतो, सम्मोहविनोदनिं नामा”ति [विभ० अट्ठ० निगमनकथा] च ॥

“बुद्धघोसोति गरूहि गहितनामधेय्येन थेरेन कता

अयं सम्मोहविनोदनी नाम विभङ्गट्ठकथा”ति [विभ० अट्ठ० निगमनकथा] च ॥

इमासु पन तीसु पञ्चपकरणट्ठकथाय नामविसेसो नत्थि आयाचको च न पकासितो, केवलं अत्तनो सद्धाय एव सज्जोदितेन आचरियबुद्धघोसेन सा कता विय दिस्सति । वुत्तज्जेतं तस्सा निगमने —

“कुसलादिधम्मभेदं, निस्साय नयेहि विविधगणनेहि ।

वित्थारेन्तो सत्तम-मभिधम्मप्पकरणं सत्था ॥

सुविहितसन्निट्ठानो, पट्टानं नाम यं पकासेसि ।

सद्धाय समारद्धा, या अट्ठकथा मया तस्साति च ॥

“एत्तावता

सत्तप्पकरणं नाथो, अभिधम्ममदेसयि ।
 देवातिदेवो देवानं, देवलोकमिह यं पुरे ।
 तस्स अट्ठकथा एसा, सकलस्सापि निड्ढिता”ति [पट्ठा० अट्ठ० १९-२४.१] च ॥

“बुद्धघोसोति गरूहि गहितनामधेय्येन थेरेन कता
 अयं सकलस्सापि अभिधम्मपिटकस्स अट्ठकथा”ति [पट्ठा० अट्ठ० १९-२४.१] च ॥

एकच्चे पन आधुनिका थेरा “अभिधम्मट्ठकथायो आचरियबुद्धघोसेन याचितो सङ्घपालबुद्धमित्तजोतिपालादीनं
 अज्जतरो थेरो अकासी”ति वदन्ति । अयञ्च नेसं विचारणा, अट्ठसालिनीसम्मोहविनोदनीसु “ता बुद्धघोसेन याचितो
 अकासी”ति गन्थकारेण वुत्तं । तेन जायति “तक्कारको अज्जो, आचरियबुद्धघोसो पन तासु याचकपुग्गलोयेवा”ति ।
 आगमट्ठकथासु च आचरियबुद्धघोसेन —

“सीलकथा धुतधम्मा, कम्मट्ठानानि चेव सब्बानि... पे०...
 इति पन सब्बं यस्मा, विसुद्धिमग्गे मया सुपरिसुद्धं ।
 वुत्तं तस्मा भिय्यो, न तं इध विचारयिस्सामी”ति [दी० नि० अट्ठ० १.गन्थारम्भकथा] —

एवं सीलकथादीनं अत्तना एव विसुद्धिमग्गे वुत्तभावो मयातिपदेन पकासितो । अट्ठसालिनीयं पन —

“कम्मट्ठानानि सब्बानि, चरियाभिज्जा विपस्सना ।
 विसुद्धिमग्गे पनिदं, यस्मा सब्बं पकासित”न्ति [ध० स० अट्ठ० गन्थारम्भकथा] —

एवं मयाति कत्तुपदेन विना वुत्तं । तेनापि जायति “विसुद्धिमग्गकारको अज्जो, अभिधम्मट्ठकथाकारको अज्जो”ति ।
 किञ्चापि अभिधम्मट्ठकथासु अभियाचको बुद्धघोसो भिक्खुनाति च यतिनाति च इमेहेव सामज्जगुणपदेहि वुत्तो न थेरेनाति
 सगारवगुणपदेन, तथापि सो “विसुद्धाचारसीलेन निपुणामलबुद्धिना”ति च, “अदन्धगतिना सुबुद्धिना”ति च इमेहि
 अधिकगुणपदेहि थोमितत्ता “विसुद्धिमग्गादिकारको आचरियबुद्धघोसोयेवा”ति सक्का गहेतुं । सो हि
 उपसम्पन्नकालतोयेव पट्ठाय गन्थकोविदो परियत्तिविसारदगुणसम्पन्नो, तस्मिञ्च काले ऊनदसवस्सो भवेय्य, तस्मा
 थेरेनाति न वुत्तोति सक्का गहेतुन्ति ।

तं पन तेसं अतिविचारणमत्तमेव । न हि आचरियबुद्धघोसत्थेरो “तस्मिं काले ऊनदसवस्सो”ति सक्का गहेतुं,
 विसुद्धिमग्गनिगमनेपि “बुद्धघोसोति गरूहि गहितनामधेय्येन थेरेना”ति वचनतो, न च “विसुद्धाचारसीलेन,
 निपुणामलबुद्धिना”ति वा, “अदन्धगतिना सुबुद्धिना”ति वा एतकेहेव द्वीहि द्वीहि गुणपदेहि थोमनेन सुथोमितो होति,
 अज्जदत्थु “निप्पभीकतखज्जोतो समुदेति दिवाकरो”ति थोमनं विय होति । ननु आचरियेन अत्तनो गन्थनिगमनेसु —

“परमविसुद्धसद्भाबद्धिवीरियपटिमण्डितेन सीलाचारज्जवमद्ववादिगुणसमुदयसमुदितेन
 सकसमयसमयन्तरगहनज्झोगाहणसमत्थेन पज्जावेय्यत्तियसमन्नागतेन तिपिटकपरियत्तिभेदे साट्ठकथे सत्थुसासने
 अप्पटिहतजाणप्पभावेन महावेय्याकरणेना”ति आदिना —

अत्तनो अनुच्छविकानि गुणपदानि पकासितानि, सोयेव च पोरानसीहळट्ठकथायो सङ्घिपित्वा अभिनवसङ्गहट्ठकथानं

आदिकत्ता पुब्बङ्गमो, अज्जे पन अभिनवट्टकथाकारा तस्सेव अनुवत्तित्वा अवसेसमेकं वा द्वे वा अट्टकथायो अकंसु। अभिधम्मट्टकथासु च यो यो अत्थो विसुद्धिमग्गे वुत्तो, सो सो यथानुपत्तद्वाने ततो गहेत्वा तथेव वुत्तो। विसेसतो पन पटिच्चसमुप्पादविभङ्गखन्धायतनधातुसच्चविभङ्गवण्णनासु ज्ञानकथावण्णनासु च अयमत्थो अतिविय पाकटो, योपि च तत्थ अप्पको कतिपयमत्तो विसुद्धिमग्गेन विसदिसो संवण्णनाभेदो दिस्सति, सोपि आभिधम्मिकानं मतानुसारेण यथा पोराणट्टकथायं वुत्तो, तथेव वुत्तोति वेदितब्बो। यथा च अट्टसालिनीयं समन्तपासादिकाय विनयट्टकथाय अतिदेसो दिस्सति [ध० स० अट्ट० १ अकुसलकम्मपथकथा], तथेव समन्तपासादिकायम्पि अट्टसालिनीया अतिदेसो दिस्सतेव [पारा० अट्ट० १.११;]। यदि च अट्टसालिनी अज्जेन कता भवेय्य, कथं तासु अज्जमज्जातिदेसो सक्का कातुं। तस्मा अभिधम्मट्टकथासु अभियाचको बुद्धघोसो आचरियेन समाननामो **चूळबुद्धघोसो**ति यावज्जतना आचरियपरम्पराय गहितो **सोतत्थ**कीगन्थकारको अज्जोयेव, न आचरियमहाबुद्धघोसत्थेरो। तेनेव तत्थ वुत्तं “भिक्षुना”ति च “यतिना”ति च।

यदि पन एतकेन निट्ठं न गच्छेय्य, एवम्पि विचारेतब्बं — किन्नु खो सङ्घपालादयो थेरा विसुद्धिमग्गादीनं करणत्थाय आचरियबुद्धघोसत्थेरं आयाचमाना अत्तना समत्थतरोति सदहन्ता आयाचन्ति उदाहु असदहन्ताति? सदहन्तायेव आयाचन्तीति पाकटोयेवायमत्थो। तथा च सति आचरियबुद्धघोसत्थेरो सयं अज्जेहि समत्थतरोव समानो कस्मा अज्जं आयाचेय्य। न हि सद्धासम्पन्नस्स थामसम्पन्नस्स योब्बनसम्पन्नस्स आचरियस्स सुन्दरतरं अभिधम्मट्टकथं कातुं भारियं भविस्सति। अभिधम्मट्टकथासु च वुत्तवचनानि विसुद्धिमग्गागमट्टकथासु वुत्तसंवण्णनावचनेहि एकाकारानेव होन्ति। यदि च अभिधम्मट्टकथं अज्जो करेय्य, कथमपि ताहि वचनाकारस्स विसदिसता भवेय्य एव। एतासं निगमने च दस्सितेन “बुद्धघोसोति गरूहि गहितनामधेय्येन थेरेन कता”ति वचनेन “आचरियबुद्धघोसेन कता”त्वेव पाकटा होन्ति, न अज्जेनाति। येपि “अज्जेन कता”ति वदन्ति, तेपि “इमिना नाम थेरेना”ति एकंसतो दस्सेतुं न सक्कोन्ति, तथा दस्सेतुज्ज लेसमत्तम्पि साधकवचनं न दिस्सति। तस्मा अभिधम्मट्टकथायोपि इदानी आचरियेहि **चूळबुद्धघोसो**ति वोहरितेन **बुद्धघोसेन** नाम भिक्षुनायाचितो विसुद्धिमग्गविनयागमट्टकथानं कारको **आचरियमहाबुद्धघोसत्थेरो**येव अकासीति निट्ठमेत्थ गन्तब्बन्ति।

यं पन महावंसे “आचरियबुद्धघोसो सीहळदीपागमनतो पुब्बे जम्बुदीपे वसनकालेयेव अट्टसालिनिं अकासी”ति अधिप्पायेन —

२२५. “धम्मसङ्गणियाकासि, कच्छं सो अट्टसालिनि”न्ति —

वुत्तं, तं इदानी दिस्समानाय अट्टसालिनीया न समेति। तत्थ हि गन्थारम्भेयेव विसुद्धिमग्गं अतिदिसित्वा पच्छापि सो च, समन्तपासादिका च बहूसु ठानेसु अतिदिसीयन्ति। तस्मा तस्सा आचरियेन सीहळदीपं पत्वा विसुद्धिमग्गज्चेव समन्तपासादिकज्च कत्वा पच्छायेव कतभावो अतिविय पाकटोति।

कङ्खावितरणीअट्टकथाकरणं

कङ्खावितरणिं नाम पातिमोक्खट्टकथं आचरियबुद्धघोसत्थेरो **सोणत्थेरेन** याचितो महाविहारवासीनं वाचनामग्गनिस्सितं सीहळपातिमोक्खट्टकथानयं निस्साय एकम्पि पदं पाळिया वा महाविहारवासीनं पोराणट्टकथाहि वा अविरोधेत्वा अकासि। तेन वुत्तं तिस्सं अट्टकथायं —

“सूरतेन निवातेन, सुचिसल्लेखवृत्तिना ।
विनयाचारयुत्तेन, **सोणत्थेरेन** याचितो ॥

तत्थ सज्जातकङ्खानं, भिक्खूनां तस्स वण्णनं ।
कङ्खावितरणत्थाय, परिपुण्णविनिच्छयं ॥

महाविहारवासीनं, वाचनामग्गनिस्सितं ।
वत्तयिस्सामि नामेन, **कङ्खावितरणं** सुभं^१न्ति [कङ्खा अट्ठं गन्थारम्भकथा] च ॥

“आरभिं यमहं सब्बं, सीहळट्ठकथानयं ।
महाविहारवासीनं, वाचनामग्गनिस्सितं ॥

निस्साय सा अयं निट्ठं, गता आदाय सब्बसो ।
सब्बं अट्ठकथासारं, पाळियत्थञ्च केवलं ॥

न हेत्थ तं पदं अत्थि, यं विरुज्जेय्य पाळिया ।
महाविहारवासीनं, पोराणट्ठकथाहि वा^२न्ति [कङ्खा अट्ठं निगमनकथा] च ॥

धम्मपदट्ठकथाकरणं

अपरापि तिस्सो अट्ठकथायो सन्ति खुदकपाठट्ठकथा धम्मपदट्ठकथा सुत्तनिपातट्ठकथा चाति, या तासु दिस्समाननिगमनवसेन आचरियबुद्धघोसेनेव कताति पज्जायन्ति । तत्थ पन वुत्तवचनानि कानिचि कानिचि आगमट्ठकथासु वुत्ताकारेन न होन्ति । तस्मा एके वदन्ति “नेता आचरियबुद्धघोसस्सा”ति । एकच्चे पन “आचरियस्स उपथम्भकत्थेरेहि पठमं कता, पच्छा आचरियेन ओसानसोधनवसेन परियोसापिता वा भवेय्युं, अभिधम्मट्ठकथं आयाचन्तेन चूळबुद्धघोसेन वा कता भवेय्युं”न्ति वदन्ति ।

तं तथा वा होतु अज्जथा वा, इदानि एकन्ततो विनिच्छिनितुं न सुकरमेव । तस्मा तासं निगमनवचनवसेनेव एत्थ पकासयिस्साम । तासु हि **धम्मपदट्ठकथं कुमारकस्सपत्थेरेन** आयाचितो **सिरिकूटस्स** (सिरिकुट्टस्स) रज्जो पासादे विहरन्तो परम्पराभतं सीहळभासाय सण्ठितं पोराणट्ठकथं पाळिभासाय आरोपेत्वा वित्थारगतञ्च वचनक्कमं समासेत्वा गाथासु असंवण्णितपदव्यञ्जनानि संवण्णेत्वा अकासि । वुत्तज्झि तत्थ गन्थारम्भे —

“परम्पराभता तस्स, निपुणा अत्थवण्णना ।
या तम्बपण्णिदीपम्हि, दीपभासाय सण्ठिता...पे०...

कुमारकस्सपेनाहं, थेरेन थिरचेतसा ।
सद्धम्मट्ठितिकामेन, सक्कच्चं अभियाचितो...पे०...

तं भासं अतिवित्थार, गतञ्च वचनक्कमं ।

पहायारोपयित्वान, तन्तिभासं मनोरमं ॥

गाथानं ब्यञ्जनपदं, यं तत्थ न विभावितं ।
केवलं तं विभावेत्वा, सेसं तमेव अत्थतो ॥

भासन्तरेन भासिस्स’न्ति [ध० प० अट्ठ० १.गन्थारम्भकथा] —

निगमने च वुत्तं —

“विहारे अधिराजेन, कारितम्हि कतञ्जुना ।
पासादे सिरिकूटस्स, रज्जो विहरता मया”ति [ध० प० अट्ठ० २.निगमनकथा] ॥

एत्थ च सिरिकूटो नाम समन्तपासादिकानिगमने सिरिपालोति वुत्तो महानामोयेव राजाति वदन्ति । एवं सति महेसिया आनयनं समादापनमारब्ध तेन रज्जा दिन्ने धूमरक्खपब्बतविहारे वसन्तेन सा कताति वेदितब्बा । वुत्तज्हेतं महावंसे —

३७-२११.विहद्वार-रलग्गाम-कोटिपस्सावनव्हये ।
तयो विहारे कारेत्वा, भिक्खूनं अभयुत्तरे ॥

२१३.विहारं कारयित्वान, धूमरक्खम्हि पब्बते ।
महेसिया’नयेना’दा, भिक्खूनं थेरवादिन’न्ति ॥

तस्स पन रज्जो काले सा निट्ठापिताति न सक्का गहेतुं । तस्स हि रज्जो एकवीसतिमवस्से समन्तपासादिकं निट्ठापेसि । सो च राजा द्वावीसतिमवस्से दिवङ्गतो । एत्थन्तरे साधिकएकवस्सेन “चतस्सो च आगमट्ठकथायो तित्स्सो च अभिधम्मट्ठकथायो अयञ्च धम्मपदट्ठकथा”ति सब्बा एता न सक्का निट्ठापेतुन्ति ।

परमत्थजोतिकाट्ठकथाकरणं

परमत्थजोतिकं नाम खुट्ठकपाठस्स चेव सुत्तनिपातस्स च अट्ठकथं केनचिपि अनायाचितो अत्तनो इच्छावसेनेव अकासि । वुत्तज्हेतं खुट्ठकपाठट्ठकथाय गन्थारम्भे —

“उत्तमं वन्दनेय्यानं, वन्दित्वा रतनत्तयं ।
खुट्ठकानं करिस्सामि, केसञ्चि अत्थवण्णनं ॥

खुट्ठकानं गम्भीरत्ता, किञ्चापि अतिदुक्करा ।
वण्णना मादिसेनेसा, अबोधन्तेन सासनं ॥

अज्जापि तु अब्भोच्छिन्नो, पुब्बाचरियनिच्छयो ।

तथेव च ठितं यस्मा, नवङ्गं सत्थुसासनं ॥

तस्माहं कातुमिच्छामि, अत्थसंवण्णनं इमं ।
सासनञ्चेव निस्साय, पोराणञ्च विनिच्छयं ॥

सद्धम्मबहुमानेन, नात्तुक्कंसनकम्यता ।
नाञ्जेसं वम्भनत्थाय, तं सुणाथ समाहिता”ति ॥

बहू पन विचक्खणा इमा आरम्भगाथायो विचिनित्वा “नेतं आचरियबुद्धघोसत्थेरस्स विय वचनं होती”ति वदन्ति । अयञ्च नेसं विचिननाकारो, आचरियबुद्धघोसो हि यं कञ्चि गन्थं सीलादिगुणसम्पन्नेन अञ्जेन आयाचितोव करोति, इध पन कोचिपि आयाचको नत्थि । पुनपि आचरियो “पोराणसीहळ्ळुकथं भासापरिवत्तनवसेन करिस्सामी”ति च “महाविहारवासीनं वाचनामगं निस्साय करिस्सामी”ति च एवं पटिञ्जं कत्वाव करोति, इध पन तादिसीपि पटिञ्जा नत्थि । पुनपि आचरियो अतिगम्भीरत्थानं चतुन्नञ्चागमानं अभिधम्मस्स च संवण्णनारम्भेपि दुक्करभावं न कथेति, इध पन “सासनं अबोधन्तेन मादिसेना”ति अत्तना सासनस्स अबुद्धभावं पकासेत्वा “अतिदुक्करा”ति च कथेति । तस्मा “नेतं आचरियबुद्धघोसस्स विय वचनं”ति वदन्ति । तं युत्तं विय दिस्सति, आचरियो हि अत्तनो गन्थनिगमनेसु “तिपिटकपरियत्तिप्पभेदे साट्ठकथे सत्थुसासने अप्पटिहतजाणप्पभावेना”ति अत्तनो जाणप्पभावं पकासेसि, सो “सासनं अबोधन्तेन मादिसेन अतिदुक्करा”ति ईदिसं वचनं न कथेय्ययेवाति ।

जातकट्टकथाकरणं

जातकट्टकथापि च आचरियबुद्धघोसत्थेरेनेव कताति वदन्ति, कारणं पनेत्थ न दिस्सति । सा पन अत्थदस्सित्थेरेन च बुद्धमित्तत्थेरेन च महिसासकनिकायिकेन च बुद्धदेवत्थेरेनाति तीहि थेरेहि अभियाचितो महाविहारवासीनं वाचनामगं निस्साय कता । इमिस्सापि नामविसेसो नत्थि । वुत्तं हिमिस्सा आरम्भे —

“बुद्धवंसस्स एतस्स, इच्छन्तेन चिरट्ठिति ।
याचितो अभिगन्त्वान, थेरेन अत्थदस्सिना ॥

असंसट्ठविहारेन, सदा सुद्धविहारिना ।
तथेव बुद्धमित्तेन, सन्तचित्तेन विञ्जुना ॥

महिसासकवंसम्हि, सम्भूतेन नयञ्जुना ।
बुद्धदेवेन च तथा, भिक्खुना सुद्धबुद्धिना ॥

महापुरिसचरियानं, आनुभावं अचिन्तियं ।
तस्स विज्जोतयन्तस्स, जातकस्सत्थवण्णनं ॥

महाविहारवासीनं, वाचनामगनिस्सितं ।
भासिस्सं भासतो तं मे, साधु गणहन्तु साधवो”ति ॥

एत्तावता च आचरियबुद्धघोसत्थेरस्स गन्थभावेन पाकटाहि सब्बट्ठकथाहि सह विसुद्धिमग्गस्स करणप्पकारो वित्थारेन विभावितो होति ।

सकललोकपत्थारकारणं

किस्सेस विसुद्धिमग्गो सकललोके पत्थटोति? परिसुद्धपिटकपाळिनिस्सयभावतो, सिक्खत्तयसङ्गहभावतो, पोराणट्ठकथानं भासापरिवत्तनभावतो, परसमयविवज्जनतो, सकसमयविसुद्धितो, सीलधुतङ्गसमथअभिज्जापज्जापभेदादीनं परिपुण्णविभागतो, याव अरहत्ता पटिपत्तिनयपरिदीपनतो, उत्तानानाकुलपदव्यञ्जनसङ्घतभावतो, सुविज्जेय्यत्थभावतो, पसादनीयानं दिट्ठानुगतापादनसमत्थानं वत्थूनञ्च दीपनतोति एवमादीहि अनेकसतेहि गुणेहि एस सकललोके पत्थटो जातो ।

अयञ्हि विसुद्धिमग्गो सङ्गीतित्तयारूळहपरिसुद्धपाळिपिटकमेव निस्साय पवत्तो, न महासङ्घिकादीनं सत्तरसन्नं निकायानं पिटकं, नपि महायानिकानं पिटकं । सपरिवारं सिक्खत्तयञ्च एत्थ परिपुण्णमेव सङ्गहेत्वा दस्सितं । वुत्तञ्हेतं आचरियेन आगमट्ठकथासु गन्थारम्भे —

“सीलकता धुतधम्मा, कम्मट्ठानानि चेव सब्बानि ।
चरियाविधानसहितो, ज्ञानसमापत्तिवित्थारो ॥

सब्बा च अभिज्जायो, पज्जासङ्कलननिच्छयो चेव ।
खन्धाधातायतनि,न्द्रियानि अरियानि चेव चत्तारि ॥

सच्चानि पच्चयाकार,देसना सुपरिसुद्धनिपुणनया ।
अविमुत्ततन्तिमग्गा, विपस्सनाभावना चेव ॥

इति पन सब्बं यस्मा, विसुद्धिमग्गे मया सुपरिसुद्धं ।
वुत्तं तस्मा भिय्यो, न तं इध विचारयिस्सामी”ति ॥

यस्मा पन विसुद्धिमग्गो चतुन्नं आगमट्ठकथानं अवयवभावेन कतो, तस्मा ता विय पोराणसीहळट्ठकथानं भासापरिवत्तनवसेन चेव पुनप्पुनागतमत्थानं संखिपनवसेन च परसमयविवज्जनवसेन च महाविहारवासीनं परिसुद्धविनिच्छयसङ्घातस्स सकसमयस्स दीपनवसेन च कतो । वुत्तञ्हेतं आचरियेन —

“अपनेत्त्वान ततोहं, सीहळभासं मनोरमं भासं ।
तन्तिनयानुच्छविकं, आरोपेन्तो विगतदोसं ॥

समयं अविलोमेन्तो, थेरानं थेरवंसपदीपानं ।
सुनिपुणविनिच्छयानं, महाविहारे निवासीनं ।

हित्वा पुनप्पुनागत-मत्थं अत्थं पकासयिस्सामी”ति [दी० नि० अट्ठ० १.गन्थारम्भकथा] च ॥

“मज्झे विसुद्धिमग्गो, एस चतुन्नम्पि आगमानञ्चि ।
उत्वा पकासयिस्सति, तत्थ यथाभासितमत्थं ॥

इच्चेव कतो तस्मा, तम्पि गहेत्वान सद्धिमेताय ।
अट्ठकथाय विजानथ, दीघागमनिस्सितं अत्थ”न्ति [दी० नि० अट्ठ० १.गन्थारम्भकथा] च ॥

“सा हि महाअट्ठकथाय, सारमादाय निट्ठिता एसा ।
एकासीतिपमाणाय, पाळिया भाणवारेहि ॥

एकूनसट्ठिमत्तो, विसुद्धिमग्गोपि भाणवारेहि ।
अत्थप्पकासनत्थाय, आगमानं कतो यस्मा ॥

तस्मा तेन सहायं, अट्ठकथा भाणवारगणनाय ।
सुपरिमितपरिच्छिन्नं, चत्तालीसं सतं होती”ति [दी० नि० अट्ठ० ३.निगमनकथा] च ॥

यदि चायं विसुद्धिमग्गो आचरियेन आगमट्ठकथायो विय अकत्वा पोराणसीहळट्ठकथायो च अनोलोकेत्वा केवलं अत्तनो जाणप्पभावेनेव कतो अस्स, नायं आगमट्ठकथानं अवयवोति गहेतब्बो अस्स, अज्जदत्थु “आगमट्ठकथायो महाट्ठकथाय सारभूता, विसुद्धिमग्गो पन न तस्सा सारभूतो, केवलं आचरियस्स मतियाव कतो”ति एवमेव वत्तब्बो अस्स । यस्मा पन तथा अकत्वा पुब्बे वुत्तप्पकारेनेव कतो, तस्मा अयम्पि विसुद्धिमग्गो तासं आगमट्ठकथानं करणाकारेनेव कतोति च, ततोयेव महाट्ठकथाय सारभूतोति च दट्ठब्बो ।

एकच्चे पन विचक्खणा आचरियबुद्धघोसस्स गन्थेसु उत्तरपक्खसासनिकानं अस्सघोसनागज्जुनवसुबन्धुआदीनं भिक्खूनं विय पोराणगन्थे अनिस्साय अत्तनो जाणेनेव तक्केत्वा दस्सितं धम्मकथाविसेसं अदिस्वा असन्तुट्ठचित्ता एवं वदन्ति “बुद्धघोसस्स अज्जं अनिस्साय अत्तनो जाणप्पभावेनेव अभिनवगन्थुप्पादनं न पस्सामा”ति । तं तेसं गरहावचनम्पि समानं थेरवादीनं **पसंसावचनमेव** सम्पज्जति । थेरवादीनो हि एवं जानन्ति “बुद्धेनेव भगवता सम्मासम्बुद्धेन देसेतब्बो चेव धम्मो पज्जापेतब्बो च विनयो अनवसेसेन देसितो चेव पज्जत्तो च, सोयेव धम्मविनयो सद्धासम्पन्नेहि भिक्खूहि चेव गहट्ठेहि च यथारहं पटिपज्जितब्बो, न ततो अज्जो धम्मविनयो तक्केत्वा गवेसेतब्बो । यदि पन अज्जो धम्मविनयो केनचि तक्केत्वा कथितो अस्स, तं तस्सेव तक्किनो सासनं होति न सत्थु सासनं । यं यं पन भगवतो धम्मविनये पदव्यञ्जनं अत्थतो अपाकटं होति, तत्थ तत्थ पोराणकेहि पटिसम्भिदाछळभिज्जादिगुणसम्पन्नेहि भगवतो अधिप्पायं जानन्तेहि अट्ठकथाचरियेहि संवण्णितनयेन अत्थो गहेतब्बो, न अत्तनोमतिवसेना”ति । आचरियबुद्धघोसो च तेसं थेरवादीनं अज्जतरो, सोपि तथेव जानाति । वुत्तज्चेतं आचरियेन —

“बुद्धेन धम्मो विनयो च वुत्तो,
यो तस्स पुत्तेहि तथेव जातो ।
सो येहि तेसं मतिमच्चजन्ता,
यस्मा पुरे अट्ठकथा अकंसु ॥

तस्मा हि यं अट्टकथासु वुत्तं,
तं वज्जयित्वान पमादलेखं ।
सब्बम्पि सिक्खासु सगारवानं,
यस्मा पमाणं इध पण्डितानं ॥

ततो च भासन्तरमेव हित्वा,
वित्थारमगगच्च समासयित्वा...पे०...
यस्मा अयं हेस्सति वण्णनापि,
सक्कच्च तस्मा अनुसिक्खितब्बा'ति [पारा० अट्ट० १.गन्थारम्भकथा] ॥

तेनेव आचरियो भगवतो धम्मविनयं वा पोराणट्टकथं वा अनिस्साय अत्तनो जाणेन तक्केत्वा वा अत्तना परिचितलोकियगन्थेहि गहेत्वा वा न कज्जि गन्थं अकासि । यदि पन तादिसं करेय्य, तं थेरवादिनो **महापदेससुत्ते** [दी० नि० २.१८८; अ० नि० ४.१८०] वुत्तनयेन “अट्ठा इदं न चेव तस्स भगवतो वचनं, बुद्धघोसस्स च थेरस्स दुग्गहित’न्ति छड्डेय्युंयेव । यतो च खो अयं विसुद्धिमग्गो पोराणट्टकथानं भासापरिवत्तनादिवसेनेव आचरियेन कतो, ततोयेव थेरवादिनो तं **महापदेससुत्ते** वुत्तनयेन “अट्ठा इदं तस्स भगवतो वचनं, आचरियबुद्धघोसस्स च थेरस्स सुग्गहित’न्ति सम्पटिच्छन्ति । तेनापायं सकललोके पत्थटो होति ।

सीलधुतङ्गादीनं विभागो च पटिपत्तिनयपरिदीपनञ्च पाकटमेव । तथायं विसुद्धिमग्गो सुविज्जेय्यपदवाक्येहि चेव अनाकुलपदवाक्येहि च तन्तिनयानुरूपाय पाळिगतिया सुट्ठु सङ्घतो, ततोयेव चस्स अत्थोपि सुविज्जेय्यो होति । तस्मा तं ओलोकेन्ता विज्जुनो विसुद्धज्झासया खणे खणे अत्थपटिसंवेदिनो चेव धम्मपटिसंवेदिनो च हुत्वा अनप्पकं पीतिसोमनस्सं पटिसंवेदेन्ति ।

अनेकानि चेत्थ पसादावहानि **महातिस्सत्थेरवत्थु**आदीनि [विसुद्धि० १.१५] सीहळवत्थूनि च **धम्मसेनापतिसारिपुत्तत्थेरवत्थु**आदीनि [विसुद्धि० १.१९] जम्बुदीपवत्थूनि च दीपितानि । तानि पस्सित्वा अनुस्सरन्तानं सप्पुरिसानं बलवपसादो च उप्पज्जति, “कदा नु खो मयम्पि ईदिसा भविस्सामा”ति दिट्ठानुगतिं आपज्जितुकामता च उप्पज्जति ।

एवं परिसुद्धपिटकपाळिनिस्सयतादीहि अनेकसतेहि गुणेहि अयं विसुद्धिमग्गो सकललोके पत्थटो जातोति वेदितब्बो । यथा चायं विसुद्धिमग्गो, एवं अज्जापि आचरियेन कता तिपिटकसङ्गहट्टकथायो पोराणट्टकथानं भासापरिवत्तनभावादीहि गुणेहि सकललोके पत्थटायेव होन्ति ।

एत्तावता च पन किमत्थं कतोतिआदीनम्पि पज्झानमत्थो वित्थारेन विभावितोव होतीति ।

तत्थेतं वुच्चति —

१. सम्भावनीयस्स सुधीवरान-
मादत्तधीरिट्ठपदस्स यस्स ।

- पञ्चादिजाता ललिता गुणाभा,
भातेव लोकमिह सतं मुदाय ॥
२. स बुद्धघोसाव्धिरग्गधीमा,
विदून्मच्चन्तसमादरांदा ।
सभावजं व्यक्तिससत्तिलद्धं,
सिरिं दधातेव सुबुद्धघोसो ॥
३. “सम्बुद्धसेट्ठे परिनिब्बुतस्मिं,
संवच्छरानं दसमे सतमिह ।
जातो”ति जातो विबुधेहि बुद्ध-
घोसङ्कुरो पत्तसमत्तमानी ॥
४. विज्जू विदून्मस्स पुमग्गजाते,
सज्जाततं दक्खिणदेसभागे ।
रम्मेन्दियस्मिं सुजनाकरस्मिं,
तत्तत्थमेसीनं मयं पतीति ॥
५. मोरण्डगाममिह स तत्थ जातो,
पुज्जानितो विप्पकुलमिह सम्मा ।
सूरस्स लोकत्थसमावहत्थं,
उप्पज्जनायां द्यरुणोव रंसि ॥
६. संवद्धबुद्धी स पवुद्धिपत्तो,
आराधयं जातिगणं सदेव ।
वेदेसु विज्जासु तदज्जसिप्प-
गन्थेस्वनायासपवीणतांगा ॥
७. सुद्धाधिमुत्तीन विवेचनेन,
सारानुसारोति विविज्जमानो ।
वेदेस्वसारत्तं मबुज्झि यस्मा,
तुट्ठिं स नापज्जि सुतेन सेन ॥
८. अन्वेसतो तस्स पसत्थसारं,
सद्धम्मसारो सवनेन लद्धो ।
निन्नोव बुद्धस्स स सासनमिह,
उस्साहजातोपगमाय तत्थ ॥

९. धम्माभिलासी स विरोचि तत्थ,
संलब्धपब्बज्जुपसम्पदोव ।
थेरे'पसङ्कम्म विसुद्धथेर-
वादीनिकायमि पतीतपज्जे ॥
१०. तदा हि'सुं दक्खिणइन्दियमि,
निवासिनो थेरियवंसजाता ।
तदज्जवादी च मुनी मुनिन्द-
मतं यथालब्धि पकासयन्ता ॥
११. सद्धम्मसाराधिगमाय भिय्यो,
पाळिं समुग्गणिह जिनेरितं, सा ।
जिह्मगलीला मनसा'सिता'स्स,
लक्खीव पुज्जे निवसं बभास ॥
१२. एवं तमुग्गण्ह'मबोधि सम्मा,
“एकायनोयं सुविसुद्धियाति ।
मग्गो विवट्ठाधिगमाय” तत्थो-
य्योगं समापज्जि परं परत्ती ॥
१३. सभावपज्जा महती च सत्थ-
न्तरोपलब्धा विपुलाव विज्जा ।
तेनस्स बुद्धोत्तिसमुद्धतिण्णे,
अकिच्छसाधित्तपभाव'मज्जा ॥
१४. बुद्धस्स कित्तीव सुकित्तिघोसो,
वत्तिस्सते'च्चस्स गरू वियत्ता ।
अत्थान्वितं नाममकंसु बुद्ध-
घोसोति सम्बुद्धमतङ्गतस्स ॥
१५. मयूरदूतव्हयपट्टनसिं,
निवस्स कज्जीवपुरादिके च ।
स अन्धकाख्यातसदेसियट्ट-
कथं समुग्गणिह समाहितत्तो ॥
१६. तावत्तकेनस्स सुमेधसस्सा-
सन्तुट्ठचित्तस्स तत्तुत्तरिम्पि ।

सम्बुद्धवाणीसु समत्तमत्थं,
अज्जातुमिच्छा महती अजायि ॥

१७. महामहिन्दादिवसीवरेभि,
समाभता यादुकथा ससारा ।
सथेरवादा सुविनिच्छया च,
तदा विभाता वत लङ्कायां सुं ॥
१८. पवत्तिमेतं विदियंस्स मेत-
दहोसि “यं नूनं भिरामलङ्कं ।
अलङ्करोन्ति रतनाकरं व,
उपेच्च सिक्खेण्डुकथा महन्ती ॥
१९. ता भासया सीहळिकाय रच्चा,
तन्तिं समारोप्य नवं करेय्यं ।
एवञ्चि देसन्तरियान बुद्ध-
मानीनमत्थं खलु साधयेति ॥
२०. पुरे च लङ्कागतसासनं यं,
सुनिम्मलिन्दूव हिमादिमुत्तो ।
पभासि, किस्मिञ्चि तदाज्जवाद-
मनाकुलं तां कुलतं जगाम ॥
२१. जिनम्हि निब्बानगते हि वस्स-
सतन्तरे सासनिका समग्गा ।
समानवादा जिनसासनम्हि,
न कोचि भेदोपि तदा अहोसि ॥
२२. पच्छा च सद्धम्मदुमाहतेभ्य-
धम्मोहि वातेहि पटिच्च पापे ।
जातेहि संविग्गमना समाय,
थेरेणं स मुय्योगमकंसु दळ्हं ॥
२३. सङ्गीतियो कच्च सुपेसलेहि,
निग्गय्हमानापि थिरेहि दळ्हं ।
छिन्नापि रुक्खांस्सु पुनोरुहावा-
कासुं व धम्मं विनयाञ्जथा ते ॥

२४. नानागणा ते च अनेकवादा,
संसग्गकारा जिनसासने^३सुं ।
वादेभि अज्जेहि जिनेरितेभ्य-
सुद्धायमाना विनयञ्च धम्मं ॥
२५. वादा च वादी पिटकानि तेसं,
लङ्कं मलङ्कं^४ करं^५पयाता ।
पटिग्गहेसुं प्यभयादिवासी,
नाज्जे महाख्यातविहारवासी ॥
२६. यथा च बुद्धाभिहिताव पाळि,
तदत्थसारा च वसीभि जाता ।
न “तेध वोक्कम्म विसुद्धथेर-
वादी विवादी”^६ति पवत्ति काचि ॥
२७. जीवंव रक्खिंसु सथेरवादं,
तन्तिं तदत्थञ्च सनिण्णयं ते ।
तस्मा न सक्काव तदज्जवादि-
वादेभि हन्तुं चु^७पगन्तुमद्वा ॥
२८. तंवादसंभेदभयञ्च मज्जया,
“दुद्धारवेलापि भयेहि तन्तिनं ।
सम्मोहतादीहि भवे”^८ति पोत्थकं,
आरोप्य सम्मा परिपालयिंसु ते ॥
२९. तदा हि तेसं पटिबाहने रण-
विदं व सिक्खं जिनसासनद्धरो ।
स बुद्धघोसो मुनि बुद्धिपाटवो,
गतो^९सि दीपं वरतम्बपण्णिकं ॥
३०. लङ्कं उपेच्च स महाट्ठकथाणवस्स,
पारं परं वितरणे थिरनिण्णयोव ।
संसुद्धवंसजनिवासमहाविहार-
मागा^{१०}म्बरं उदयिन्दु^{११}पसोभयन्तो ॥
३१. तस्मिञ्च दक्खिणदिसाय वसी स तत्थ,
सोभं पधानघरसज्जितपारिवेणं ।

पासादमुत्तममका सुजनेभि सेव्यं,
सन्तो महानिगमसामि सुचिण्णधम्मो ॥

३२. सम्मा च योगमकरी बुधबुद्धमित्त-
थेरादिमन्तमुपयातमनूनतन्ते ।
संसेवितो विविधजायपबुद्धिया सो,
सुत्ताभिधम्मविनयट्ठकथास्वनूनं ॥
३३. वेय्यत्तियंस समये समयन्तरे च,
पज्जाय दिस्व विवटंव निहीतमत्थं ।
थेरा समग्गजिनमग्गमतामतासी,
मज्झिंसु नग्घरतनंव सुदुल्लभन्ति ॥
३४. विज्जाय धम्मविनयत्थयथिच्छदाने,
चिन्तामणीति सुनिरूपितबुद्धिरूपं ।
यस्सेत्थ निच्छित्तमनो कविसङ्गपाल-
त्थेरुत्तमो जनहिताय नियोजयी तं ॥
३५. “किञ्चापि सन्ति विविधा पटिपत्तिगन्था,
केसज्जि किञ्चि तु न बुद्धमतानुसारं ।
संसुद्धथेरसमयेहि च ते विरुद्धा,
तस्मा करोतु विमलं पटिपत्तिगन्थं” ॥
३६. मेत्तादयम्बुदवनं जनभूमियंस,
संवस्सते चरियमग्गमग्गमग्गं ।
संसोधनत्थमिति “पत्थितथेरआसं,
पूरेस्समेतमिति कासि विसुद्धिमग्गं ॥
३७. वीरानुकम्पसतियोजितबुद्धिमा सं,
ओग्गय्ह, गय्ह च खिलट्ठकथा सतन्ती ।
सारं सखेदमनपेक्खिय साधुकं स,
यंकासि, कं नुं ध न रोचयते बुधं सो ॥
३८. वुत्तेत्थ भावपरमाव सभावधम्मा,
वत्थू च पीतिसुखवेदनियांनिताव ।
पुण्णोव सब्बपटिपत्तिनयेहि चेसो,
पुप्फाभिफुल्लपवनंव विराजतेयं ॥

३९. यं पस्सियान परिकप्पिय रत्नसार-
गब्भं विसुद्धिं मभियातुं मपेक्खमाना ।
तं सारं मादियितुं मासु पयुत्तयुत्ता,
दिस्वा हि नग्घरतनं ननु वज्जये न ॥
४०. कन्ता पदावलिं ह तन्तिनयानुसारा,
सारातिसारनयपन्ति पसिद्धसिद्धा ।
अत्था च सन्तिनुगमाय तुलायमानो-
य्योगेन मेत्थ हि विना पटिपत्ति काञ्जा ॥
४१. आभाति सत्थु चतुरागममज्झगोयं-
अत्थे पकासयिह भाणुव नेकदब्बे ।
मेधाविपीतिजननं स विधानं मेतं-
तीतज्झि याव कविगोचरं मस्स जाणं ॥
४२. दिट्ठाव तिक्खमतिं मस्स विसुद्धिमग्ग-
सम्पादनेन समुपात्तसुधीपदेभि ।
तेनस्स बुद्धवचनत्थविभावनाय,
पब्यत्तसत्ति विदिता विदितागमेहि ॥
४३. ख्यातं कवीभिधिगतं यसं मावहेन,
थेरस्स सुद्धमतिबुद्धसिरीहयस्स ।
लोकत्थं माविकतपत्थनं मादियान,
सामञ्च निन्नहदयेन जनानं मत्थे ॥
४४. सम्बुद्धभावविदितेनिमिना समन्त-
पासादिकाव्विनयट्ठकथा पणीता ।
सूरोदिते विय तया विनयत्थमूळहा-
मूळही भवन्ति जिननीतिपथाधिगन्त्वा ॥
४५. लङ्का अलङ्कृतिकताव महामहिन्द-
त्थेरेन या च विनयट्ठकथा भता, तं ।
कन्ताय सीहळगिराय गिरायमाना,
अच्चन्तकन्तबहुला मुनयो पुरासुं ॥
४६. अज्जा च पच्चरि-कुरुन्दिसमज्जितादी,
दीपं पदीपकरणी विनयम्हि यासुं ।

सङ्गः तासं मखिलत्थनये च थेर-
वादे च मुत्तरतनानिव मेकसुत्ते ॥

४७. ताहेव सीहळनिरुत्तियुतञ्च तन्तिं,
आरोपियान रुचिरं अथ वित्थतञ्च ।
मग्गं समासनवसेन यथा समत्त-
लोकेन या गरुकता कतमाननांका ॥

४८. सुद्धन्वयागथविरा च विसुद्धथेर-
वादी विसुद्धविनयागमपुज्जधम्मा ।
सुद्धं करिंसु न यथेन्ति तदञ्जवादा,
इच्चादिं भाविकरियांसि निदानमेत्थ ॥

४९. यस्मिं मनुज्जपदपन्ति सुभा सुबोधा,
अत्था च पीतिसमं विम्वयतादिभावी ।
चित्रा विचित्रमतिजा कविचित्तहंसा,
तस्मा रसायति तदत्थनुसारिनं यं ॥

५०. अच्चन्तसागरनिभा विविधा नयत्था,
सन्तेत्थ यासु विनयट्ठकथा पुराणा ।
तासं यथाभिमतपन्ति सुतन्तिकत्तं,
किञ्चिस्स किञ्चि बलवीरं पटिच्च कातुं ॥

५१. उय्योगं मस्स करुणापहितं पटिच्च,
पज्जासहायसहितं बलवञ्च दळ्हं ।
लद्धाव या निखिललोकमनुज्जभूता,
मेधाविनं नुसभगाव विराजते सा ॥

५२. विज्जूभि या “विनयसागरपारतिण्णे”,
सम्भाविता “सुतरणायति सीघवाहा” ।
इच्चाभिमानितगुणाञ्ज रराज याव,
किं यं थिरं लहु विनस्सति दुप्पसय्हं ॥

५३. “या ब्यापिनीं खिलनयस्स सुबोधिनी च,
सोतूभि सेवितसदातनधम्मरङ्गं ।
कत्त्वान लोकपहिते सगुणे दधन्ती,
ठातू”ति नट्टमुपगाट्ठकथा पुराणा ॥

५४. जनाभिसत्ताय दयाय चोदितो,
विछेज्ज खेदं विनयमि साधुनं ।
अथागमानं ढुकथाविधानने,
धुरं दधातुं भिमुखांसि सो सुधी ॥
५५. पद्मं व फुल्लाभिनतं सुभाणुभं,
लब्धान फुल्लं तिसयांसि चेतना ।
दाठादिनागेन थिरग्गधीमता,
या पत्थिता रब्भ तदत्थसिज्जने ॥
५६. दीघागमत्थेसु सबुद्धिविक्कम-
मागम्म साराधिगमा सुमङ्गल-
नामानुगन्ताव विलासिनीति या,
संवण्णना लोकहिताय सम्भवी ॥
५७. गम्भीरमेधाविसयागमहिपि,
आरब्भ बुद्धिं स सुनिम्मलीकता ।
विज्जातबुद्धाभिमता बहू जना,
अज्जत्थसाधा महतज्झि बुद्धियो ॥
५८. सा नीतविद्वाक्खिमना मनायिता,
कन्तागमे धम्मसभायते सदा ।
तेनेव मज्जेह तिरोकता तया,
किं सीघगज्जत्र पथज्जगामिका ॥
५९. पत्वा महन्ताम्बरं मम्बुदो यथा,
लोकत्थसाधीपि महासयं मति ।
तस्मास्स सिद्धा ढुकथापरम्परा,
बुद्धिप्पदानाय हुवुं नवा नवा ॥
६०. बुद्धादिमित्तं थिरसेट्ठं मुद्दिसं,
संवण्णना चासि पपञ्चसूदनी ।
“सब्बत्थसारे जिनमज्झिमागमे,
लब्धान पीतिं सुजना समेन्तु”ति ॥
६१. उप्पज्जि “सारत्थपकासिनी”ति या,
सा जोतिपालस्स यथाभिलासितं ।

लोकं यथानामिकसारदीपना,
भातांसि सम्मापटिपन्नपन्थदा ॥

६२. सम्पूरि कातुंस मनोरथो यया,
अङ्गुत्तरन्तागममत्थवण्णना ।
तन्नामधेय्यं सुजनञ्च जीवकं,
सो जोतिपालञ्च पसत्थधीतिमं ॥

६३. उद्दिस्स यंकासि पवीणतं करं,
बुद्धादिसंसेव्यसुमग्गदस्सने ।
सद्धम्मपुप्फानं वनायितांसि सा,
विद्वालिसङ्घस्स सदावगाहणा ॥

६४. येनंत्तलद्धिं पजहन्तु साधवो,
दुब्बोधधम्मे च सभावदीपने ।
बुज्झन्तु, इच्चासिंभिधम्मसागरो,
तत्थांवतारं सुकरेन साधिनी ॥

६५. मेधाविलासांस्संहुवुंढसालिनी,
कन्ता च सम्मोहविनोदनीति या ।
ता बुद्धघोसोति सतुल्यनामिक-
मागम्म जाता सुजनत्थसाधिनी ॥

६६. अज्जा च पञ्चद्वकथांभिधम्मजे,
भावे निधायेत्य यथांस्सु सुत्तरा ।
गम्भीरमत्थेसु पविद्धबुद्धितं,
सम्पादनी सत्थुंतुलत्तदीपनी ॥

६७. सोणाव्थेरस्स पटिच्च याचनं,
ता याय कङ्का वितरन्ति भिक्खवो ।
या पातिमोक्खम्हि, तदन्वयाव्हयं,
संवण्णनंकासि स धीमतं वरो ॥

६८. समत्तलोकद्विविभाविरञ्जना,
कर्तेमिना धम्मपदस्स वण्णना ।
थिरं समुद्दिस्स कुमारकस्सपं,
सतं मनं पीतिपफुल्लितं यया ॥

६९. अज्जा'स्स या सुत्तनिपात-खुद्दक-
पाठत्थदाता परमत्थजोतिका ।
संवण्णना जातकतन्ति मण्डना,
ता होन्ति लोकस्स हितप्पदीपिनी ॥

७०. निस्सेसलोकहि पचारणिच्छा,
लङ्कागतान'ट्ठकथान'मद्भा ।
या थेरवादीन'मपूरि बुद्ध-
घोसग्गथेरस्स पभावलद्भा ॥

७१. भद्द'स नामज्ज, गुणा मनुज्जा,
समग्गगामी'नुकरोन्ति तेसं ।
ससङ्कसूरा हि सदातना ये,
लोकं पमोदज्ज करं चरन्ति ॥

७२. सुबुद्धघोसस्स विभाविसत्ति-
पव्यत्ति'मारब्भ थिरासभस्स ।
समग्गलोको हि सुथेरवादे,
मानं पवट्ठेसि अनज्जजातं ॥

७३. बुद्धोति नामं भुवनहि याव,
सुबुद्धघोसस्स सिया न किञ्चि ।
लद्भा हि साधूभि महोपकारा,
महग्गवित्तानिव तंसकासा ॥

७४. खीयेथ वण्णो न समुद्धटोपि,
नन्व'स्स नेका हि गुणा अनन्ता ।
को नु'द्धरेय्या' खिलसागरोदे,
तथापि मज्जन्तु सुधी सदा तेति ॥

छट्टसङ्गीतिभारनित्थारकसङ्घसमितिया पकासितायं

विसुद्धिमग्गनिदानकथा निद्धिता ।